

ASO LUA, 17 MATI 2015

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2015.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

MALELEGA MAI LE SUI O LE FONO A SUI TOFIA

Na fofogaina e le Fofoga Fetalai le Malelega Mai Le Sui o le Fono a Sui Tofia.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene, ua tuuina atu nei le maliega i le Fono Aoao Faitulafono na te iloiloaina ai ia Tulafono Tau Faaofi ua faaalua i inei.

1. Tulafono Tau Faaofi o Faiaoga 2015.
2. Tulafono Tau Faaofi o Vai Pulea Tumaoti 2015.
3. Tulafono Tau Faaofi o Feagaiga i Sineva 2015.
4. Tulafono Tau Faaofi o Teuteuga o le Tulafono o Taavale Feoai i Ala Tetele 2015.
5. Tulafono Tau Faaofi o le Faauigaina o Tulafono 2015.

TUUINA ATU i lou nei Lima, i lenei aso 13 o Mati i le tausaga 2015.

**(Sainia): TUIMALEALIFANO VAALETOA SUALAUVI II
SUI O LE FONO A SUI TOFIA.”**

ISI FAASILASILAGA A LE FOFOGA FETALAI

FOFOGA FETALAI: I le agaga ma le faaaloalo e tatau ai i lenei taeao fou, ou te faatalofa atu i le paia maualuga o le tatou Maota i le paia ma le mamalu o sui usufono uma o le tatou Palemene i lenei taeao fou i le suafa manumalo o lo tatou Alii Faaola o Iesu Keriso, ou te faafeiloai atu i tulaga aloaia. Afio maia ma tala mai aao, i le paia o lau Afioga i le Palemia ma lau Kapeneta mamalu le paia foi o sui usufono mamalu o le Palemene ua tatou toe aofaga potopoto i lenei taeao fou, ia malo le folau, malo le soifua manuia, malo le onosai, malo le galulue. E manatu sa tatou taumavae i nai vaiaso na tuanai atu, ona ua tolopoina le tatou Fono i feau, tiute ma galuega sa tatou feagai ai, peitai o lenei taeao e le faaitiitia le faafetai i le Atua, aemaise le faamalo atu i o outou faiva alofilima ua mafai ai ona tatou toe faatasi i lenei taeao fou.

Ia malo le onosai, malo foi le taupati mai ma le onosai mai i le tatou Fono i lenei masina. E i ai le faamoemoe o lea ua tolaulauina le tele ma le anoanoai o nisi o Tulafono Tau Faaofi taua pei ona i ai le tatou faamoemoe i le aso ananafi, ia sa faasalalau tuusao atu foi i le tatou Televisi i le po anapo i upega o faamatalaga ia le atoaga o le taua o le tatou galuega i lenei masina. E tatalo atu ai pea ma le agaga faaaloalo i le paia ma le mamalu i sui usufono uma o le tatou Palemene, ia sagai maia o le a faasolo le tatou galuega i lenei masina, e i ai lava le manatu, e ala lava ona umi o le falo o le afaloloa i tuleiga ma saunoaga. Ae talitonu ua manino ma malamalama lelei, o le agaga na o tatou Tulafono faamalamalama, ina ia maua so outou finagalo e aunoa ma se saunoa puaoa i Tulafono ua faatulai atu. A o le agaga o le tatou Malo aemaise o polokalame faalauiloa a le tatou Palemene, ina ia sagatonu lau o le fo ma taoto i le moa o le ala la outou tofa saili, ma la outou tofa faatamalii e matimati ai so o se Tulafono e tuuina atu i totonu o le tatou Palemene nei aua lona lauiluina aemaise o le faatulagana i le mea e talafeagai ai ma mafua ai ona tulai mai lenei Tulafono fou, aemaise foi o Tulafono Toe Teuteu.

Ua tatou faatasi i lenei taeao ma le paia ma le mamalu o le tatou atunuu ua faatumulia ai le Maota nei, le afifio o afioga i alii ma tamaitai faiaoga, aemaise o tatou alo ma fanau o le tatou atunuu, o latou nei o alo ma fanau o le tatou atunuu o lo o faasolo pea polokalame faalauiloa a lo tatou Malo ma le Palemene, ina ia silafia e tupulaga lalovaoa aemaise tupulaga mu'amu'a o Samoa o lo o i lalo i aoga tau amata aemaise primary school, latou te omai e silasila ma vaavaai i tu ma aga o lo o faamoemoe ai taitai o le atunuu i tulaga uma aua le faafoega o le Palemene ina ia o latou silafia. O le manatu autu, ia ola aoaoina lelei alo ma fanau a le atunuu mo le lumanai, aua e alu aso ae sau aso, ia e le fai mo tatou le Palemene nei. E i ai foi lo latou taeao ina ia o latou silafia mea uma, ae lelei le oo atu i o latou taimi ua malamalama lelei i tu ma aga faa-Palemene aemaise le ola aoaoina lelei. Ia afio maia ma tala mai aao i alii ma tamaitai faiaoga aemaise le afifio o alo ma fanau a lo tatou atunuu.

E faatalofa atu foi i Faauluuluga o Matagaluega ua tatou faatasi i lenei aso, malo le soifua manuia.

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono, e tusa ai ma le T.T.48.

1. S.R. 2015/6, Tulafono Faatonutonu o le Pulega o Tupe a le Malo (Taavale a le Malo) 2015.
2. P.P. 2014/2015 Nu. 207, Tali atu a le Malo i le P.P. 2014/2015 Nu. 138, Lipoti a le Komiti o Tupe Maua ma Tupe Totogi i le P.P. 2014/2015 Nu. 10, Lipoti Faaletausaga a le Kamupani o Pulega a le Faaputugatupe Teufaafaigaluega o Mavaega Tausi a Samoa mo le Tausaga Faaiuina aso 30 Iuni 2013.
3. P.P. 2014/2015 Nu. 208, Lipoti Faaletausaga a le Pulega a le Malae Vaalele a Samoa mo le Tausaga 2013.
4. P.P. 2014/2015 Nu. 209, Tali atu a le Malo i le P.P. 2014/2015 Nu. 143, Lipoti a le Komiti o Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 80, Lipoti Faaletausaga a le Iunivesite Aoao o Samoa mo le Tausaga faaiuina 1 Iulai 2011 – 30 Iuni 2012.
5. P.P. 2014/2015 Nu. 210, Lipoti Faaletausaga a le Matagaluega o le Palemia ma le Kapeneta Iulai 2011 – Iuni 2012.
6. P.P. 2014/2015 Nu. 211, Lipoti Faaletausaga a le Matagaluega o le Palemia ma le Kapeneta Iulai 2012-Iuni 2013.

TUUINA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono, e tusa ai ma le T.T. 51(5).

1. P.P. 2014/2015 Nu. 212, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Teuteuga o le Tulafono o Aso Malolo mo Tagata Uma 2014.
2. P.P. 2014/2015 Nu. 213, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Faatulagaga Faaletulafono o Fua o le Mamafa ma Fua Eseeese o Oloa 2014.
3. P.P. 2014/2015 Nu. 214, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale, Atinae o Afioaga ma Agafesootai i le Tulafono Tau Faaofi o le Faalapotootoga Faavae e Uunaia le Soifua Maloloina Lautele 2013.
4. P.P. 2014/2015 Nu. 215, Lipoti a le Komiti o Tupe Maua ma Tupe Totogi i le P.P. 2014/2015 Nu. 151, Lipoti Faaletausaga a le Kamupani Vaalele a le Polenisia mo le Tausaga Faaletupe 2013/2014.
5. P.P. 2014/2015 Nu. 216, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2014/2015 Nu. 120, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe 2012/2013.

6. P.P. 2014/2015 Nu. 217, Lipoti a le Komiti o Faafoga tau Pulega a le Malo i le P.P. 2014/2015 Nu. 124, Lipoti Faaletausaga a le Komisi e Pulea Galuega a le Malo mo le Tausaga Faaletupe 2010/2011.
7. P.P. 2014/2015 Nu. 218, Lipoti a le Komiti o Tupe Maua ma Tupe Totogi i le P.P. 2014/2015 Nu. 78, Lipoti Faaletausaga a le Pulega o Tupe Faava o Malo mo le Tausaga Faaletupe 2013.
8. P.P. 2014/2015 Nu. 219, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P. 2014/2015 Nu. 119, Lipoti a le Komisi o le Toefuataiga o Tulafono a Samoa i le Tulafono o Alii ma Tamaitai Loia 1976, Lipoti 05/11.

TULAFONO TAU FAAOFI O TEUTEUGA O LE TULAFONO O LE PULEGA O TAULAGA 2014 – faitauga faalua

FOFOGA FETALAI: Mo le silafia e le Palemene, o le Tulafono Tau Faaofi leni sa faia lona faitauga muamua i le aso Fono 26 o Ianuari 2015.

Tulai mai lau Afioga i le Minisita mo Galuega, Felauaiga ma Atinae Eseeese.

Afioga Hon MANUALESAGALALA MATI TUIGAMALA ENOKATI POSALA (Minisita mo Galuega, Felauaiga ma Atinae Eseeese): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Taulaga 2014 i lona faitauga faalua ma ou te fia tautala faamalamalama i ai.*

Faaluaaina e le Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi, Minisita mo le Soifua Maloloina, Minisita mo Aoga, Taaloga ma Aganuu, ma le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei.

FOFOGA FETALAI: Tulai mai lau Afioga i le Minisita e saunoa faamalamalama.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai aemaise le mamalu maualuga o leni Maota i leni taeao, ua e siitia foi le faafetai i le Atua aua ua mafai ona taitai manuia mai le soifua manuia o le Maota nei, aemaise foi o lo o saogalemu lo tatou atunuu. Ua tatou molimauina i Televisi ma tala o lo o afaina nisi o motu o le Pasefika ona o afa ma matagi, ae faafetai i le Atua o lo o taitai le soifua manuia o lo tatou atunuu mai ia mala faanatura.

Malo foi i le tapuaiga o le Tafatolu o Faigamalo aemaise o Ekalesia e fia, o Matagaluega ma Faalapotopotoga a le Malo o lo o vae ma lima i ai aua galuega fai ma atinae, ae le faagaloina Afia i si ona vao ia Samoa.

A o le Tulafono leni, o le Tulafono Tau Faaofi e Teuteu ai le Tulafono o le Pulega o Taulaga 1998, o le Tulafono Autu lea. A o le sini autu, o le faatagaina lea ona faaliliu atu o pule e umia ai taulaga i Mulifanua ma Salelologa mai le Pulega o Taulaga a Samoa i le Faalapotopotoga o Vaa a Samoa, ua faia foi Teuteuga i le Tulafono Tau Faaofi faatasi ai ma isi aiaiga o

le Tulafono Autu ina ia atagia ai le Teuteuga e aloaia ai le faaliliuina atu o Taulaga nei po o uafu i Mulifanua ma Salelologa.

O le silasila mamao a le Malo, ina ia mafai ona tasi le Pulega e vaايا femalagaiga o vaa faatasi ai ma uafu nei e lua, o le uafu i Mulifanua ma le uafu i Salelologa, o uafu ia o lo o femalagaai ai lo tatou atunuu. E 24 malaga i le aso i le va o ia uafu e lua, o le silasila totoa i ai o le tasi o Pulega, ia e ono foia ai le tele o nisi o faafitauli, mai i taimi ua tuanai, a oo ina malaga mai le vaa taunuu i Mulifanua, ia e togi mai, vaeatu le Maota, e togi mai e le seila o lo o i lalo o le Faalapotopotoga o Vaa agai i lalo o le uafu i le tagata faigaluega o le uafu, ia le maea foi lea e mafai ona fesootai ai e taula i ai le vaa, e tele la faafitauli e tulai mai, ona a oo ina tulai mai faafitauli, e afaina ai peapea ma faaleagaina ai afi. E tele foi le taimi e fetusia ai, ma tausaili po o ai le tonu po o ai le sao, a o ia faafitauli ua manatu ai le Malo, ina ia faia se suiga, suiga lelei, suiga ia tasi e mataitu ma ia lelei ai fuafuaga faatino. Atonu foi a silasila i ai i lenei taimi, ia ua i ai suiga o tatou uafu ia i Mulifanua, suiga ia ua agai ai ia ona ua tasi lava, o le upu foi a le atunuu, “o le tele o lima e mama se avega, ae o le tele foi o lima ia ua mu se kuka.” O lona uiga o le mea e sili ona taua, ia tasi le Pulega e mafai ona mataituina vaa ma uafu ina ia aua ne i tulai mai ni faafitauli, ia ma tau saili po o ai e sao ae po o ai e sese.

Ou te talitonu o uafu nei ma vaa nei e femalagaai i lo tatou atunuu, o tulaga e sili ona taua, e taua tele mo e o lo o nonofo i Salafai e femalagaai mai, ua faafaigofie femalagaiga ona o le lelei o le faatinoga o galuega o lo o faatino i a tatou vaa ia, ae vaavaai foi ona e tele faafitauli ua tulai mai i uafu. O lona uiga e tatau ona mataalia le Pulega i le vaiga o uafu ona o le maaleale o le suiga o le tau ma le siisii o le tai ma vaega faapena. O lona uiga, a vaavaai atu le Faalapotopotoga o Vaa i mea ua tatau ona faatino loa ina ia malupuipua a seta ma vaa, o mea ia e faigofie ai i lo le tau soalaupule i le isi Pulega e faatino vaega ia. O lo o faatumauina pea le Pulega o Uafu ma Taulaga i totonu o tatou uafu faava o Malo. O uafu ia i Salelologa ma Mulifanua, pei o uafu ia e patino tonu mo le femalagaai o le tatou atunuu i Upolu nei ma Savaii. E pei o se suiga alagataua lea ua talafeagai ma lenei vaitaimi ma o se fuafuaga atamai tele mo femalagaiga a le tatou atunuu. Ma le agaga faaaloalo lau Afioga i le Fofoga Fetalai.

FOFOGA FETALAI: Malo faafetai saunoa faamalamalama i lau Afioga i le Minisita. E manatu foi o lea ua faafofoga ma le manino le Maota. E momoli atu lava le agaga faafetai i lau Afioga i le Minisita ma lau Tulafono Tau Faaofi, o se Tulafono Tau Faaofi e maitauina o se tasi lenei o Tulafono taua ua tuuina mai. Ma e le toe natia o lea ua silasila uma le atunuu aemaise lava o matou nei mai Savaii, ua matua faatupulaia le matagofie o teuteuga ma mea uma ua faatinoina e le Ofisa, o lea foi ua faatulai mai le Tulafono Tau Faaofi, o le itu taua lena. Ou te lagona foi e leai se sui usufono e fia saunoa i lenei Tulafono Tau Faaofi. Ou te ofo pe a i ai se Savaii e toe fia tulai e lauga i lenei Tulafono Tau Faaofi taua ua aumai. Ae o le a avatu pea le avanoa, o le a avatu muamua le avanoa i le tamua, aua o le tamua lava lea a lea Itu o le Maota. Papalii, lauga e lagolago le Tulafono Tau Faaofi mo tatou i Savaii.

Tulai mai le sui usufono mo Faasaleleaga Nu.2.

Susuga PAPALII LIO FAAVAIvaiomanu TAEU MASIPAU (Faasaleleaga Nu.2): Faafetai i lau Afioga i le Fofoga Fetalai mo le avanoa,

aemaise foi le faafofogaaga a le Maota. E aufaatasi foi lenei usugafono i le viiga ma le faafetai ua siitia e lau Afioga i le Atua ma lona agalelei e le mavae lava mo Samoa aemaise foi o le tatou Fonotaga i lenei aso i le agalelei o le Atua ua taitai manuia mai le maualuga o le Maota o Samoa.

E talitonu foi o le a agai tonu se manatu i lenei Tulafono Tau Faaofi taua. E moni lava le saunoaga a lau Afioga i le Fofoga Fetalai, o lea ua maitauina e tatou sui usufono mai Salafai lenei foi suiga. O le agaga lea e avatu ai le agaga faafetai i lau Afioga i le Minisita ma le Pulega o lea ua maitauina suiga, aemaise lava o le tatou uafu lea i Mulifanua. I la matou lava vaai, o lea ua lelei, ua taua foi lenei suiga ua i ai ina ia faaleleia atili le tatou uafu i Mulifanua ma le tatou uafu i Salelologa. Ia, ou te iloa foi o se avanoa taua lea e toe silasila i ai lau Afioga i le Minisita ma le Pulega i le tatou uafu i Salelologa. Ou te iloa o lea ua manaia Mulifanua i la matou lava maitau ma le vaai, o lea ua malupuipua foi auala ma i latou uma e faimalaga i Savaii, o lea ua manaia pa ma tulaga faapena, ae na o Salelologa lena e.... A silasila i ai lau Afioga o le tele o taimi e fetulinai solo nai o matou tagata i Savaii, a uma ona tuu atu i le isi itu tuu mai i le isi itu. E le o mautu lelei Salelologa i le taimi lenei, ae ou te talitonu, ua avea lenei Tulafono o se avanoa e ono fesoaoani ai i lau Afioga ma le Pulega ma sei silasila totoa ifo le matou motu i Savaii ma le uafu i Salelologa, e moomia lava le fai o se mea tumau e pei o le uafu i Mulifanua, i le matou vaai o lea ua manaia ma aulelei, ae toe lava o se talosaga lena i Salelologa, atonu o se avanoa foi lea e faaleleia ai ma si o matou uafu i Salelologa.

O le isi itu, aua o Salelologa lava ia o la e ua uafu faava o Malo, e moomia foi nai vaa mo Savaii. Aua o le taimi lenei, na gata lava i na tausaga o alu atu se vaa feoloolo i Savaii, a o le taimi lenei, ua le toe alu atu. Ae atonu o le avanoa lenei, o lea o le a agai atu loa ma ni vaa lelei i Savaii ma faatosina atu foi nai turisi.

Ua maua foi lenei avanoa sei avatu foi i le matou nuu i Savaii sei feoai foi i Savaii vaa o le avanoa lea ua i ai lea suiga, e talitonu lava lau Afioga i le Minisita ma le Pulega, o le a maua ai se fesoasoani ma faaaulelei mai ai le matou uafu i Salelologa.

O le isi itu lau Afioga i le Fofoga Fetalai, aua o lea ua maitau atu o lea o le a liliu uma lava e oo i aseta, o aitalafu, o mea uma na. O le mea lena lau Afioga, ne i tei ua liliu uma atu aitalafu a le Pulega o uafu i Salelologa ma Mulifanua, ona tei lea ua sii ai le pasese o matou mai Savaii. A o le tatalo lena, silasila ifo i lea vaega, nei tei ua avea ma avanoa e siitia ai le pasese o Savaii i le tulaga lea ua fai faapea. Ae a faapea o lea e silasila i se mea mautu ma lelei ma agai ai le manuia o Savaii ma tatou uma feoai, ia o le agaga lena o le sui usufono. E momoli atu ai le agaga faaaloalo lau Afioga i le Fofoga Fetalai i lenei Tulafono Tau Faaofi. Ma le faaaloalo lau Afioga.

FOFOGA FETALAI: Malo faafetai i lau Afioga i le sui usufono mamalu. Tulai mai... Malie Manua o lea o le a avatu le avanoa i sui usufono ona tasi ai lea o le taimi e avatu ai folasaga ma tali mai. Tulai mai Leaupepe, se tasi o sui usufono mo Aana Alofi Nu.1.

Afioga Hon LEAUPEPE TOLEAFOA APULU FAAFISI (Aana Alofi Nu.1): Faafetai mo le avanoa. Lau Afioga i le Fofoga Fetalai, ua ou manatu o lea ua tomua le sa o Savaii, ou te iloa ona pau lea o se lauga a Savaii, e

faapena foi Upolu, masalo ona pau lea o se lauga a Upolu. Ua ou tulai atu ma le agaga faaloalo e faalia le agaga faafetai ma le faamalo i le Afioga i le Minisita ma le Malo e tusa ai ma lenei Tulafono Tau Faaofi ma le suiga e pei ona i ai, ona o le aotelega lava o nei mea uma o le suiga mai le lua Pulega i le tasi o le Pulega, aua e tasi lava le auunaga. E aoga foi lea e faatupu manatu i le Malo i nisi o Matagaluega po o Faalapotopotoga e lua Pulega ae tasi lava le auunaga, ina ia faasaoina ai le feutagai, fetusiai ma le alu ai o le taimi, ae taoto le mea o la e tatau ona faaleleia. O i la lea o le a vave ai ona siitia le lelei o le auunaga e le gata i vaa, a o le mea e taunuu i ai vaa, o uafu, e pei ona taua mai nei, aua o au sa ou popole, o aso nei na o le togi maiga o le maea mai le seila i lalo i i, pei na o le pau lena o le mea o lea e sui ai le Tulafono Tau Faaofi lenei. A o lea la pei ua toe tau lou mafaufau, leai, o le manaia o le Tulafono, aua o le Tulafono lenei ua leva ona tatau ona faatino, ona e tasi le auunaga, e tatau foi ona tasi le Pulega. Ae aoga foi le tulai mai o lena foi eseese muamua i le eseese o Pulega ae tasi le auunaga e faatonutonu ai ma aoaoina ai le tulaga e tatau ona foia ai le faafitauli. E fai la ma aoaoga ma lesona aoga lenei foi suiga ua i ai. E momoli atu ai foi le agaga faamalo ma le agaga faafetai i lau Afioga i le Minisita ma le Pulega, aua a lua pitomaea e falo, e motu le maea, ae a tasi lava le pitomaea e falo ae taula lelei le isi itu, e faapena ona siitia le auunaga, manuia ma o tatou tagata. Faafetai.

FOFOGA FETALAI: Malo faafetai. Ia tulai mai lau Afioga i le Minisita e ana le Tulafono Tau Faaofi.

Afioga Hon Manualesagalala Mati Tuigamala Enokati Posala: E i ai si mea lea na laga mai e le sui usufono lea, ua pau i le faamalamalama. E pei la o le tulaga lea i le uafu i Salelologa, o lea ua faagasolo i ai le Faalapotopotoga mo le faaleleia o tatou uafu e pei ona i ai le uafu i Mulifanua. O la e ua amata faatino a latou fuataga, survey, ona faasolo ai loa lea o latou polokalame, ou te iloa a tuai o le amataga o le masina fou. Ae o le polokalame la o lo o i ai, o lea o le a faagasolo i Salelologa. E pei foi o lea sa atugalua i ai le sui usufono mamalu ona o tulaga i aseta ma aitalafu, o lena lava e manino mai lalo o le Tulafono Tau Faaofi, lena e faapea mai, o aseta uma ua faatonuina i Tulafono Faatonutonu i aitalafu ma noataga, o loo faagasolo pea polokalame mo tatou regulations. O Tulafono Faatonutonu la na e mafai ona maoti mai ai tulaga i aitalafu, aemaise o aseta o lo o i ai i le taimi lenei ua liliu mai ai i lalo o le Faalapotopotoga vaega uma na o lo o tamau mai i le tatou Tulafono ina ia aua nei atagia ai pei ona i ai le popolega, ae faafetai lava mo le faamanatu mai.

FOFOGA FETALAI: Malo faafetai. Sei tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai, a e maua mai o au lea e taletale, ua taei le leo, e leaga foi le mea o le taitaipese, faipese toe lelei maoae, toe lelei le leo, sa ou pese i le matou aufaipese talu ai i Falevao, e tutupu a mea faapea. A ua ou tulai atu ona ne i tei ua toe tulai mai Levaopolo ona talanoa lea i le maea lea e togi, leaga o maea ia na o mea o cowboy e tietie i le solofanua ona togi lea o le maea e sele ai le ulu o le povi, se i tulou. E le mafai la e le tama lea ona togi le maea ona sau lea o le maea lavea i le

mea foi lea e taula ai le vaa. E tatau ona i ai se isi e tu atu i lalo e pue le maea. Afai la e eseese Pulega ae ta le afa o le fa manava le aufaigaluega, e togi mai le maea e leai se isi e tu atu i lalo e pue, ona toe fiti atu loa lea o le maea taai i le tapili o le vaa ona malepe loa lea. E i ai le taimi na malepe ai le tapili o le tatou vaa. A tupu soo la le mea lea, e tatau ona fai se fofo. E le gata i lea o le taunuu mai o le vaa a ua manava le aufaigaluega ona o le eseese o Pulega, ua taape atu ai foi lea ma pasi, faaletonu ai lea o i latou uma e o i Savaii. Lau Afioga i le Fofoga Fetalai, o lea ua ou tau atua le mea lea ua ou vaai atu toeitiiti lava tu mai le tama lea o Levao ma le faamoemoe aua e te tu mai luga o lea ua tali le mea. Ae o le a ou le toe tu atu lava leaga e oo atu i ai ua atili ai ona taei lou leo. Ia manuia le tatou Fono. E faamalulu atu.

FOFOGA FETALAI: Malo faafetai. Ia, Levaopolo.

Tofa LEVAOPOLO TALATONU (Gagaemauga Nu.2): Lau Afioga i le Fofoga Fetalai, faafetai tele lava mo le avanoa. Ua ou alofa atu foi i le Taitai ua gasegase, ia alofagia e le Atua ia toe faafoi ifo lou siufofoga i le mea e tatau ona i ai.

Ae leai, e faamauina le agaga faafetai i le Matagaluega aemaise o lau Afioga i le Minisita e tusa ai ma le Tulafono Tau Faaofi, aemaise lava mo auaunaga ua amata ona siitia ma faaleleia. E faafetai atu ai foi mo lena auaunaga lelei mo i matou i Savaii. Ae na pau lava lea lau Afioga i le Fofoga Fetalai o se vaega e atugalua ma popole ai lou sui usufono ona o le tulaga lea ua faamatuu atu nei le vaaiga o mea uma nei i le Faalapotopotoga a le Shipping. O lea la e pei e foliga mai o lea o le a i ai foi ma le Regulatory Power lea i i latou te faia ai mea o tulaga o Tulafono, a o latou foi nei o lea e faipisinisi i le tulaga o vaa ma mea faapena. O lea la ou te fesili atu, pe o i ai la se Tulafono ua le toe talia ai se isi kamupani po o nisi o le private sector e fia avatu ni o latou vaa e fai ai lea pisinisi. Aua o lea sa tatou maitauina mai lena foi fatia ua sola, sa i ai lava tulaga faapena. Ae a faapea o la e i ai, o lona uiga la e ono afaina ai se faatauga ma le private sector i le tatou Tulafono lea, aua o lea o le a laufali le tatou Shipping toe play ai i le mea lea. Na pau lena o le vaega sa ou fia... aua o lea e molimauina foi i le va lea o le Airport Authority ma airlines. E pei e tutusa lava tulaga ia, o lea foi e i ai faaaitaui. O lea la ua aumai foi e le vaega lea mea tau Shipping ma le gataifale, o le mea lava e tasi. A o le popolega lena i te i foi ua toe tulai mai nisi faaletonu.

O le isi mea lea e tau tilotilo atu ai, e pei ua fenumiai solo tulaga o le pulega o le tatou uafu, lea o le a pule le Shipping i Mulifanua ma le international port i Salelologa, ae le oo le latou pule i Matautu. O le mea lea e popole i ai, o le faiga o mea o technical audits, o tulafono i lalo o le IMO po o le International Maritime Organisation. O ai tonu la lea o le a nafa ma le... i le silasila ina ia comply uma le tatou atunuu i tulaga faava o Malo. E pei o vaega ia o lea e tau avatu ai le fesili, ina ia maua se faamalamalamaga lau Afioga. Faafetai.

FOFOGA FETALAI: Malo faafetai. O le a tailua taitolu ona avatu lea o le avanoa e faigofie ai i lau Afioga i le Minisita. Tulai mai le sui usufono mo Aiga i le Tai ona sosoo ai lea ma Gatoloai.

Susuga IFOPO MATIA FILISI (Aiga i le Tai): Faafetai i lau Afioga i le Fofoga Fetalai mo le avanoa. Ua saunoa foi se tasi o sui usufono – ia ua uma

le sui usufono mo Upolu ma Savaii a o le sui usufono la lenei o Manono, o le motu lea i le ogatotonu. Faamolemole - ou te muamua ona ou faafetai i le Afioga i le Minisita ma le Pulega, leaga o le mea foi lea sa ou lauga ai muamua faafetai lava mo le uafu i Mulifanua faapea foi le uafu i Salelologa i ona fuafuaga mo le saogalemu o o tatou tagata femalagaai i le uafu. Ou te toe faamanatu atu faamolemole tasi la lea aua e lua uafu o Salelologa ma Mulifanua ma le uafu lea i Manono, e toe talosaga atu ai faamolemole pe oo atu i ai fuafuaga a le Malo i le uafu i Manono, aua o lea foi e autovaa i ai tatou e malaga atu i tai i mea faale-Malo faapena ona i ai tagata o lo o agai i tai.

O se faamatalaga puupuu lea ma le faaaloalo lava. Faafetai.

FOFOGA FETALAI: Malo faafetai, tulai mai le sui usufono mo Faasaleleaga Nu. 1, Afioga Gatoloaifaana Amataga Alesana Gidlow.

Afioga Hon GATOLOAIFAANA AMATAGA ALESANA GIDLOW (Faasaleleaga Nu. 1): Faafetai i lau Afioga i le Fofoga Fetalai mo le avanoa, ou te muamua ona faafetai i le Minisita mo lenei Tulafono Tau Faaofi taua ma le matagofie e siitia ai foi le auaunaga mo le matou motu i Salafai. Ae talu ai ona o le faamuamua e pei ona faalogologo atu i ai, o le agaga lava o le faamuamua mo le faaleleiga o le auaunaga. Ua na o ni nai tuualalo e tuu atu ai ina ia faa-atili lelei ai lea faamoemoe. E maitauina pea i taimi o femalagaiga a le mamalu o le atunuu i aso taitasi, e atili lava i aso tumutumu ia i latou e faimalaga atu i Savaii ma toe foi mai i le feomai o i latou e faimalaga atu. O le fautuaga ma le tuu a lalo pe mafai ona tagai i se auala foi lea e faamuamua ai nai tina ma nai tamaiti laiti, sosoo ai ma nai penisione ina ia atoatoa le faamanuiaga mo i latou o lo o tali a latou penisione aua ua lava foi le soifuaga o le tautua a ua avea lea ma avanoa e faamuamua ai i latou, aua a o nei na o le autalavou ua le toe amanaia si tina o lo o tauave le pepe i ona aao ma nai tagata matutua o lo o tau tootoo atu.

E pei o nai tuualalo na e avatu ina ia atili faaleleia ai le tatou auaunaga ae faafetai tele mo lenei Tulafono Tau Faaofi taua ua tuuina mai i lenei taeao.

Faafetai tele lava i lau Afioga i le Fofoga Fetalai.

FOFOGA FETALAI: O le a papa aveloa ina ia faigofie lau galuega lau Afioga i le Minisita.

Tulai mai le sui usufono mo Faleata Sasae, ona sosoo ai lea ma le sui usufono mo Faleata Sisifo.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai, faafetai atu foi i le Afioga i le Minisita mo le Tulafono Tau Faaofi e lagolagoina foi e lou nei sui usufono le Tulafono Tau Faaofi ma ua leva ona tataua ona faatino. E lua lava nai mataupu ia faamolemole lau Afioga i le Fofoga Fetalai.

O le vaega muamua, o le taimi nei o lo o i ai le vaega a le SPA o lo o faaopoopo i luga o pasese o tagata o lo o femalagaai i le taimi lenei. E aveese la le tau lenei pe a oo ina pasia le Tulafono Tau Faaofi faamolemole lau Afioga? E i ai lou manatu e tataua ona aveese lea vaega o lo o faaopoopo i luga o pasese o tagata o lo o feoai i Savaii ma isi mea o lo o alu ai vaa sa i lalo o le SPA.

O le vaega lona lua, o lea foi ua tulai mai i le Tulafono Tau Faaofi o lea foi o le a ave ai ma aitalafu agai i le Shipping, ao lea lava e tumau le vaega lea e i le uafu i Matautu. Afai o i ai ni vaega na faatau i tupe o le aitalafu lea i Matautu e transfer foi la ma le vaega lea o masini ma ni mea faapea sa lavea i aitalafu lea o le a alu i le Shipping pe tumau pea aitalafu nei i lalo o le SPA? Ma le faaaloalo lava lau Afioga i le Fofoga Fetalai.

FOFOGA FETALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa. Faafetai foi i le Minisita mo le Tulafono Tau Faaofi, ae i ai nai vaega nei e fia fesili ai mo le fia malamalama. Muamua, faafetai ou te talitonu o le faiga lea ua fai ai nei ua alu ese mai ma faiga masani o le Pulega o Uafu, e le gata o Samoa nei ao le tele o atunuu. E ese lava le Pulega o Uafu, ese le Pulega o le Kamupani Vaa o le faiga masani lea. Ou te talitonu o le faiga lea ua fai ai nei a tatou uafu nei, o se faiga talafeagai ma lelei, e work - aua ua maitauina le tele o le suiga tele ua i ai talu ona tulai mai.

Faafetai foi i le Pulega o Uafu ua tele tausaga o latou pulea nei Uafu ae faafetai o lea o le a tumaoti lava lo latou tiute i le vaaiga o Uafu faava-o-Malo i fafo. E concentrate ai lava ma alu ai lo latou malosi e fai faalelei ai uafu nei aua e tele le latou galuega e moomia mo le faaleleia o nei uafu e sili atu i lo uafu ia, ae taatia mai uafu ia i le va o tatou e faatino e tagata o lo o i ai a latou lava vaa aua o latou e ona customers. O tagata feoai i vaa o i latou nei e iloa lelei manaoga o tagata nei e pei o le faatinoina o galuega ma mea uma. Ona pau lava le popolega lea ua tulai mai e pei ona saunoa ai se tasi o matou sui usufono i le vaai mamao a le Malo i le Privatisation, aemaise pe a i ai se taimi e fia faaofi mai ai se kamupani e fia tauva i le va lea o Savaii ma Upolu. Aua e le i mamao atu foi na i ai le Kamupani a tama fanau a Samoa sa feoai i le va lea – manatua foi o le uafu i Salelologa ua declared o le uafu faava o Malo e mafai lava la ona vaelua faapea, o le isi vaega lea e o ai vaa mai fafo ao le isi vaega masani lea e o ai vaa a i inei, pe faapefea ona fai, aua ua uma ona declared as an International Port. O lea foi ua talosaga se tasi o sui usufono o lenei Itu mai Salafai pe a fia omai ni vaa mai fafo ma afe i ai, pe faapefea la ona maioio? O lea ua aumai le suiga ina ia atagia i le Tulafono a le SPA, o lou talitonuga ma lou vaivaiga, sa tatau ona aumai faatasi ma ni suiga po o ni amendments i le Tulafono a le Samoa Shipping, aua i lalo o le latou mandate e le o ia i latou le malosiaaga e operate ai ni uafu. O lou talitonuga sa tatau ona aumai e work faatasi ina ia effective faatasi ma le transferring o uafu nei.

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le Samoa Shipping o le Kamupani, o la e galue i lalo o le Companies Act. E leai la se mea e aafia ai i.

Tofa LEALAILEPULE RIMONI AIAFI: Afai la o lo o i lalo o le Companies Act o lona uiga o lena e iina le latou--- a o lalo lava o le latou

Tulafono Tau Faaofi lea na ou faitau ai nei e le o i ai so latou malosiaaga ae afai e mafai ona fetuunai o le a le afaina.

O le mea la lea i aitalafu lau Afioga i le Minisita, o lea ua transfer ma aitalafu. E fia malamalama lava lou sui usufono pe fia atoa ni aitalafu? Aua o lona uiga o aitalafu e patino tonu lava ia Mulifanua ma Salelologa lea o le a transfer a o le a foi le faiga o nei aitalafu? O le a foi le mafuaaga o le a totogi ai e le Kamupani Vaa nei aitalafu, aua o Kamupani uma lava a le Malo ae le faaauau ai pea pe afai e talafeagai. Ua uma foi ona talanoa ma i latou aua o lo o i ai foi le regulatory role a le MWTI, o lea e faaauauina pea le latou galuega. Aua e moni lau Afioga i le Fofoga Fetalai, o le mea e maitauina e pei foi o Lipoti Faale-tausaga e tuuina mai e le Palemene, a ovataimi le SPA e totogi e le Kamupani Vaa ma Kamupani o lo o faaaogaina le uafu. O le tulaga lena e tuu atu ai pea i autafa o lau Afioga i le Minisita ma le Malo i le agai i luma i se taimi e toe ono faaofi mai ai ni kamupani a nisi foi e fia auauna i le va o Savaii ma Upolu, po o i ai se avanoa o le Tulafono Tau Faaofi e toe fetuunai ai lea vaega.

Ma le faaaloalo lava faafetai.

FOFOGA FETALAI: Malo faafetai. O le a tuu atu le avanoa i le sui usufono mo Aana Alofi Nu. 3 ona tuu atu ai lea o le avanoa mulimuli mo se tasi o sui usufono mo Salega, Afioga Afualo Wood Uti.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Faafetai i lau Afioga i le Fofoga Fetalai mo le avanoa. Faafetai atu foi i le Minisita ma le Kapeneta mo le Tulafono Tau Faaofi. E i ai nai vaega e fia avatu ai foi le manatu i le Tulafono Tau Faaofi e pei ona faailoa foi e nisi o sui usufono i le fia malamalama. O lou nei sui usufono e le gata o aitalafu ao nisi o aseta uma. Pe fia le aofai uma o aseta ma ana aitalafu. O le manatu lau Afioga i le Fofoga Fetalai, ona o le tasi lenei vaega o le itutino o le SPA i le Lipoti o le tausaga ua tuanai, o lea sa feoloolo seleni e maua mai ai, e lei i ai se gau o le Pulega o le Uafu na maua ai, e le pei o isi uafu faapei o Satitua. E fia malamalama pe aisea ua ave ai lea uafu ae talitonu o le tasi lea vaega o lo o tele ni aseta mo le Pulega o le Uafu sa i ai.

O lona lua lau Afioga, e pei foi ona faaalua o le tulaga o lea e i ai o le International Port le uafu i Salelologa, e tele tomai faapitoa o lo o i ai i totonu o le Pulega a le SPA e vaai ai e le gata o regulations ma policies e faatatau i International Ports, a o tagata faapitoa e i ai lo latou malamalamaaga, ou te talitonu o le operation o le Shipping i tausaga ua tuanai o le tele lava o le vaaiga o vaa ma le faalolotoina o le uafu ma le faateleina ma nisi o vaega faapitoa tau uafu. E vaai atu pei o le a lua foi la, e ese le tagata faapitoa e vaaia le uafu i Matautu ma nisi o uafu i lalo o le SPA, a o le a manaomia foi ni tagata faapitoa i ia tulaga i le vaaiga o le uafu i Salelologa.

O le tulaga foi lea lau Afioga e fia maua ai la se malamalamaaga i tagata, afai e suia nei le Tulafono Tau Faaofi, po ua i ai ni tomai faapitoa i totonu o le Faalapotopotoga o le Shipping e mafai ona tauave ai ia vaega.

Ma le vaega mulimuli lau Afioga i le Fofoga Fetalai, e avatu ai ma le talosaga ona o le SPA, o lea e i totonu lava o le tatou Komiti faa-Palemene o lo o faapea ona aumai pea Lipoti ma tau maua ai se malamalamaaga o le tatou Palemene. Peitai ane, o le vaega lea o le Shipping, ua silia ma le 10 tausaga e le i oo mai lava ni Lipoti i le tatou Palemene. Afai la e avatu ai foi

le fautuaga ina ia mafai ona aumai Lipoti Faaletausaga a lenei Pulega ina ia mafai ona maua ai se fautuaga ma se malamalamaaga o le tatou Palemene i le faatinoina o atinae o lo o faapea ona faailoa mai. Faafetai.

FOFOGA FETALAI: Malo faafetai. Tulai maia le sui usufono mamalu Afualo, se tasi o sui usufono mo Salega.

Afioga AFUALO WOOD UTI SALELE (Salega): Faafetai i lau Afioga i le Fofoga Fetalai mo le avanoa. Faafetai i le Atua i lenei taeao fou ona ua toe usuia le tatou Fono.

O le Tulafono Tau Faaofi lea ua opea i le Maota, ou te faafetai atu foi i le Afioga i le Minisita ona e moni lava o le Tulafono Tau Faaofi mo le fegasoloai o le atunuu, ae pei lava o lea e ifo tonu lava le fuiniu i le lapalapa, o lea lava e manuia, aemaise lava o le matou motu i Savaii aua o tatou uma lava o Savaii.

A o nai vaega laiti lava ia faafetai ona o lea ua mafai ona tuufaatasi, e moni ai le upu a le isi Saienitisi tautaua lava, “E moni lava tatou te pupuu ae mafai ona tu i luga o le tauau o le isi ma vaavaai mamao ma tatou iloa atu. We may be short but we can stand on each other’s shoulders and look afar.” O lea la ua i ai le Tulafono Tau Faaofi lenei. Faafetai. A o nai vaega laiti lava ona o le tulaga lea e i ai, o lea ua laga uma e le tele o sui usufono aitalafu aemaise foi o tau. Aua sa i ai lava le lagona ne i tei ua alu ai alu ai ae tua i le sii o pasese. Ou te talitonu o lena e i ina le uta a le faimea, ou te iloa o lena lava e lava le tupe faafoe, a o le taua o lenei Tulafono Tau Faaofi, o le lelei faatino lea o le galuega ina ia aua ai ne i toe mafai ona feteenai e foi o lo o faigaluega i Pulega e lua, ae ausia ai le mea sili mo le manuia, e le gata mo le Matagaluega, a o le auunaga mo le atunuu.

Ona oo mai ai lea o lau fesili, aemaise o le Aoga a le Marine, ona o lea ua ou faalogo o lea lava ua i ai le aoga a le Shipping. Ou te manatua o lena foi e alaalatai mai le Afioga i le Minisita mo Aoga, aua o lea e i ai le aoga a tatou ne i tei ua feteenai ma le tulaga lea, ona o la e ua tapena lava le aoga ia e faatatau la mo seila ina ia, e aoga foi mo lou silasila i ai i lea tulaga. A faapea o le tapenaga ina ia mautinoa ua taunuu i le sini autu lea ina ia maua le siitiaga lea o le auunaga i le mea aupito sili, ona ou lagolagoina lea. Ae afai o la e toe faatino foi e latou a o lea e i ai le aoga a le Iunivesite o lea foi o lea tatala le aoga tele lea a tatou, ona ou fesiligia lea po o le a tonu le agaga aemaise o le tofa o lo o taoto ai. A o isi vaega uma, faafetai mo le Tulafono Tau Faaofi i lau Afioga i le Fofoga Fetalai.

FOFOGA FETALAI: Malo faafetai saunoa. Ia, tulai maia lau Afioga i le Taitai o le Itu Agai.

Afioga Hon PALUSALUE FAAPO II (Taitai o le Itu Agai): Lau Afioga i le Fofoga Fetalai, ou te tulai atu foi ma le faaaloalo e faafetai mo lou avanoa, e le umi foi se faamatalaga, ona o le taua o le Teuteuga ua aumai nei. O lea ua aumai, fofola mai mafuaaga. A o lau fesili; e le o le mafuaaga o le gau o le SPA? E le o le mafuaaga autu lea? E tau foia ai le faafitauli o lo o tulai mai i le Pulega o Taulaga? O le a le mea ua le ave ai ma le uafu i Satitua lea na tele le tupe na alu ai? E pei o fesili ia e tulai mai i lou mafaufau ona o le mafuaaga tonu ua ala ai ona sui le Tulafono Tau Faaofi.

FOFOGA FETALAI: Malie le Taitai o le Itu Agai se i tulai mai le Afioga i le Minisita mo Galuega, Felauaiga ma Atinae Eseeese leaga o lea ua taua tulaga ia.

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai, mo le faasaoga o le saunoaga ua gau le SPA. E leai, o la e lava tupe e faatino galuega a le tatou Pulega o Uafu ma Taulaga o lo o sologa lelei lava mea uma. Sa faamatuu foi i ai le fesoasoani a le Malo, ia o le faiga lava lea, e tuuina atu ina ia mafai ona togitogi ai nai aitalafu ma faatulaga ai mea uma. O la e lava e sologa lelei mea uma e le o taofia ai femalagaiga a vaa ma tulaga uma. E le o le tulaga la lea sa silasila i ai le Malo. A o le faaleleia o uafu ia mo lo tatou atunuu o lea e femalagaai mai Upolu i Savaii, Savaii i Upolu, o le mea e sili ona ave i ai le faamuamua o lo tatou lotoifale. O le agaga lena sa faatino ai le Tulafono, ma le agaga faaloalo.

FOFOGA FETALAI: Malo.

Afioga Hon PALUSALUE FAAPO II: Lau Afioga i le Fofoga Fetalai, ua le mafai e le Pulega o Taulaga ona faalelei Salelologa ma Mulifanua, o le mea sao lena. Ua ala ona ave le uafu i le Samoa Shipping, ona ua le gafatia e le SPA, e alofa atu i lau Afioga o lo o e gasegase.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le agaga atoa ia faalelei femalagaiga, o lea e molimau mai outou ia mai Savaii, ua atili lelei le femalagaiga, po o le faaleleia o le SPA po o le faaletonu, e tataua ona fai ai se fofo, e le faapea o le taufaifai, e le lelei se mea o le nofo ma taufaifai.. A o le agaga e aupito sili ona taua, o le faaleleia o femalagaiga, lea ua faataunuu. Ia o le tali lena.

FOFOGA FETALAI: Malo. Ia e fautuaina foi lau Afioga i le Taitai o le Itu Agai, e pei lava ona ou taumafai atu i le taimi ua sola, ina ne i lavea le maaveave le fua i a tatou saunoaga, leaga e le o agai le tatou Tulafono i isi uafu e pei ona taua i lau saunoaga.

A o le agaga lea sa taumafai mai lenei Tulafono, o le ala foi lea o lou fesoasoani atu, ona o au nei e moe i luga o le uafu i femalagaiga nei, e taumafai pea ina ia lelei le va lea o le femalagaiga o la foi e molimau mai le faafogafoga a Salafai, afai foi ua agai le Tulafono mo le faaleleia o itu ia, ia se i oo mai foi le Tulafono a le SPA, ona outou agiagi foi lea i le mea e masani ai, ae ona o le Tulafono lenei o lo o faataatia e uiga i fesuaiga ina ia manuia faigamalaga, o le ala lea e tuu atu ai foi le tuualalo i lau Afioga i le Taitai o le Itu Agai, ina ne i aafia nisi o Faalapotopotoga a le Malo, a o lo o sagatonu agai i le fuafuaga agai i le uafu lea e tau fai ai suiga a le Matagaluega.

Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, e i ai lou atugaluga o lea ua laga mea ia. O le taimi nei i le kamupani vaa, o lo o solosolo lelei, o lo o solosolo lelei le auunaga, a o le aumai o isi mea ia i

totonu, i toso atu ai ma le Samoa Shipping i le mea o lo o faaletonu ai nei le pulega o taulaga. A silasila la i ai ou te le vavalo, o lea ua ave aitalafu ma mea uma i le Shipping. O Savaii e sii o outou pasese e kava ai aitalafu nei. O le mea na o lea ou te popole ai lau Afioga i le Fofoga Fetalai, o le toso atu o le Shipping i i ma goto atu ai ma latou, ona e le taugofie ia.....

FOFOGA FETALAI: O lea ua maua le finagalo o lau Afioga i le Taitai o le Itu Agai. Se i tuu mai le saunoaga a le Afioga i le Minisita pe fia, aua o lea o le a tatou lauvivilu i aitalafu, ae le iloa po o a aitalafu, e le iloa pe na o se \$20 a o lea o le a tatou.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te faamalo i le Minisita ua mafai ona faia mea ia, o aso la a o Minisita le Taitai o le Itu Agai, e na te le i mafaia, na matua ia le mafai ona faia mea ia.

Afioga Hon PALUSALUE FAAPO II: Lau Afioga i le Fofoga Fetalai, o le mea e fia faasao. Ou te alu ese ma le SPA e \$17miliona le tupe o lo o i le Bank, ioe, e le i gau faapea le mea ua i ai nei. O le uafu la e i Satitoa ua faaletonu ai le latou polokalame. O le mea lea ou te taumafai atu ai lau Afioga, o lo o solosolo lelei le Shipping i le taimi lenei.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea foi lena e inaina ai i Satitoa, aua e na te le i faia, e na te le i mafai ona fai.

FOFOGA FETALAI: Ia se i tulai mai le Afioga i le Minisita. scope

Afioga Hon Manualesagalala Mati Tuigamala Enokati Posala: O le tausaga e 2013, sa fai ai le scoping studies a le Pulega o Uafu ma Taulaga, o fautuaga la ia sa tuuina mai, ina ia faamatuu i tua uafu ia, uafu ia e i ai Mulifanua ma Salelologa, o le vaavaai mamao lea a ia foi tagata poto faapitoa na omai aumai le latou suesuega faatino le latou fautuaga. O le tausaga na tea nei sa alu le matou malaga ma matou afea Ausetalia i lalo i Melbourne, ona matou o laia i le isi itu o Geelong, o i ina o lo o i ai uafu ia ua amata ona faataitai i ai le layout o a tatou uafu ia i Mulifanua ma Salelologa, o le kamupani lea latou te lisi mai i le Malo fanua o le uafu ma vaa, e tasi le kamupani o la e faatinoa ia femalagaiga. O lona uiga, o lea faatoa tau faamasani tatou, a o le mea o la e masani ai fafo ona faatino galuega, se i vagana lava tulaga i International Ports ia e faamaoti ai tulaga, o tulaga masani faava o Malo, o le tulaga foi lea, afai ua tuuina atu i le Faalapotopotoga o Vaa uafu ia, e tatau foi ona latou ausia standards ia e moomia mai e le IMO ma tulaga faa-International Laws and Regulations lea e agai i ai femalagaiga a vaa. O lo o i ai foi le Ministry of Works, o latou lea o lo o faia le latou regulatory role foi lea e vaai faale-Tulafono ia tulaga ia. O

lona uiga, o lo o agai i ai le fautuaga, ma agai i ai le vaaiga, ina ia ausia tulaga maualuga ma le maoae, o le vaavaai lea i ai. Ona pei e foliga mai o aitalafu ia e agai tele i ai, a o lea e i ai o lea e aumai i le Tulafono, o lo o faagasolo ia le polokalame a le Komiti lea sa filifilia ma vaavaai i ai i Regulations, o Tulafono Faatonutonu ia e agai i ai tulaga o aseta ma aitalafu ia, e le aumaia fua mea o isi uafu e fai ai uafu ia e lua, e pau lava ia o uafu o lo o agai i ai, o Mulifanua ma Salelologa, ia manino ma malamalama.

Ua valu tausaga talu ona i ai tulaga o pasese ia e i ai i femalagaiga ia e silia ma le valu tausaga talu ona tulai mai, o le alu o le penisini ma le siisii e matautia, o lea faatoa amata ona agai i lalo, ae sa tumau lava, mai le valu tausaga na tau o pasese ia, ona outou silasila lea, leaga e aumai e tuuina atu i le Kapeneta ia mafai ai ona faataatia ma fai le faaiuga. O le agaga lena ona o lea e ave le faamuamua i femalagaiga a le tatou atunuu, e taua tele, aemaise o le tatou motu i Savaii o la e faafofoga mai, e taua tele, e manumanu i o tatou lava tagata ma le tamaoiga o i ai. O lona uiga, o le saunoaga foi lea i tulaga, ia e itiiti lava se tupe lea sa mafai ona aumai i pasese ma taavale ia sa faaogaina i femalagaiga e maua e le Pulega o Uafu ma Taulaga mai le SSC, o tulaga na e i ai. O lona uiga e leai foi se aafiaga i tulaga na i pasese ia, o lo o faatumauina lava mai le valu tausaga lea ou te talanoa ai le tulaga o femalagaiga i le va o Upolu ma Savaii, ia a o le tau o le soifuaga i le suauu ma mea uma o lo o siisii pea i luga. E le o se faiga faamasani le mea lea e pei ona taua, o le taumafaiga lea e fuafua nei i ai, o la e faavae i atunuu i fafo, o le ala foi lena o le omai o sailiiliga ma tuuina mai le fautuaga, ua tataua ona faamatuu i tua uafu ia, a o le silasila lea a le Malo, e le avea i tua ae ave i lalo o le Shipping ma... o le isi SOEs, aumai le isi taga tuu i le isi taga e manuia ai le agai i luma o lo tatou atunuu.

E pei o le aotelega lena, ae soia ia le atugalua e uiga i a tatou aitalafu ia, o la e i ai Tulafono Faatonutonu, ia ona maoti mai laia o lo o faatino pea ia le galuega a le Komiti lea sa filifilia. Ma le agaga faaaloalo.

FOFOGA FETALAI: Tulai mai le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, e le toe umi lava se manatu, ae na ona faapea, e le taugofie le faaleleiga o uafu, o fea le mea e aumai ai tupe e fai ai? E aumai i pasese o tagata feoai, e aumai i pasese o tagata Savaii ma Upolu. O le ala lea o lou fai atu ma lou atugaluga, e le gata ina te i ua gau ai ma le Shipping, ae le gata i lea, o le sii o pasese femalagaai e faatupe ai la mea ia, aua e le te i te i gau le SPA, e taugata, e taugata le faaleleina o uafu. Pau lava lea o lou popolega, o lea e lelei le Shipping, i toso mai i totonu i i faaletonu ai, aemaise o le faatupega o mea uma nei, faatasi ai ma pasese o tagata.....

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai, se i ou fesili atu lava i le Taitai o le Itu Agai.....

FOFOGA FETALAI: Se malie le Taitai o le Itu Agai, se i tulai mai le Afioga i le Minisita.

Afioga Hon Manualesagalala Mati Tuigamala Enokati Posala: E te le finagalo e faaleleia uafu ia i se tulaga maoae aua le femalagaai o Upolu ma

Savaii? E te le manao i ai e faatino lea tulaga lelei ua laalaa i ai le Malo? Se i aumai sou finagalo?

FOFOGA FETALAI: Tulai mai.

Afioga Hon Palusalue Faapo II: Ia leaga o lea ua fai mai le fesili, o lea ou te manao e tali atu.

FOFOGA FETALAI: Ia tali le fesili.

Afioga Hon Palusalue Faapo II: O lau tali, ua leva ona tatau ona fai, ua leva ona tatau ona faaleleia, ioe, ana faapea e fai ma faaleleia, e le taugata mo le SPA aemaise le Shipping lea ua alu lea ua ave ai nei i ai le uafu, ua leva ona tatau ona fai.

Afioga Hon Manualesagalala Mati Tuigamala Enokati Posala: Ia o lea sa e i ai muamua, e te le i faia i ai se mea?

Afioga Hon Palusalue Faapo II: Sa matua lelei ma atoatoa mea uma, na fou mea uma, ioe. O le tali atu lea ma le faaloalo. Manuia le Fono.

FOFOGA FETALAI: Ia tulai mai lau Afioga i le Minisita e i ai se isi mea e te finagalo i ai, po o le a avatu le tatou fesili?

Afioga Hon Manualesagalala Mati Tuigamala Enokati Posala: Leai, o lena ua tuuina atu ma faamanino atu, aua o le tele lava o fesili ia e agai mai, ia ma nai isi foi lava saveugamea ia sa agai mai, vaeatu lau Afioga i le Fofoga Fetalai, ae ua maea atu se faamatalaga lau Afioga.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ou te toe tu atu lava e toe faamalo i le Minisita, ua tele lau galuega, ona o le tele o mea sese a Palu na fai.

FOFOGA FETALAI: Ia malo faafetai i lau Afioga i le Minisita. E faaleoina le agaga o lea foi e tapuai mai le paia ma le mamalu o le motu tele i Salafai.

Tofa Lealailepule Rimoni Aiafi: Lau Afioga i le.....

FOFOGA FETALAI: Alaala i lalo le sui usufono mo Faleata Sisifo, alaala i lalo le sui usufono mamalu o lea ua uma le tatou.....Ia ona o le agaga o le faamalo atu i tulaga o le tatou Tulafono tulai mai, ia e le na ma se laina, o lea foi e silafia e nisi o sui usufono mamalu mai Upolu nei le tele o suiga o lea ua i ai. O le agaga faafetai lena e fai ai lou leo e fai ma fofoga taumomoli o le motu tele i Salafai, faafetai le manatu, faafetai le matimati ma le tulaga o le faamoemoe. Ae o le agaga ma le faamoemoe, ia tatou tuuina atu lenei

Tulafono taua mo lona faatulagana ina ia manuia le tulai mai o lenei Tulafono.

O le a le mea lea e toe tulai mai ai le sui usufono mamalu?

Afioga Toeolesulusulu Cedric Pose Salesa Schuster: Faafetai lau Afioga i le Fofoga Fetalai mo le avanoa. Leai na ona toe faafesili leaga e le i maua i le tali mai a le Afioga i le Minisita nisi o fesili sa tuuina atu i le vaega lea o le aofai o se tau o aseta o le a transfer aemaise foi o aitalafu.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, se i auiliili le Tulafono pe a foi mai ona tali ai lea o mea ia.

FOFOGA FETALAI: O lea na saunoa manino le Afioga i le Minisita o lo o faasolo regulative issues ia ona tulai mai lea o le aofaiga o aitalafu ia ma aseta, lea na manino le.....o lea na ou maua na tapa e le sui usufono mamalu.

Ia le sui usufono mo Faleata Sisifo.

Tofa Lealailepule Rimoni Aiafi: Faafetai. E le toe fesili, e pau lava le mea sa...leaga o lona na saunoa lau Afioga i le mea lea o Regulation...manatua o lea ua saunoa le Afioga i le Palemia i le mea lea o le Companies Act, o lona uiga e le aumaia foi la i i, ae le afaina o lea o le a ave i le Komiti, ia atonu o le a tali ai fesili.

FOFOGA FETALAI: Leai, aua le atugalua le sui usufono mamalu, ou te manatu e oo mai lava i le taimi o auiliiliga o le Tulafono.

Le sui usufono mo Gagaemauga Nu. 2.

Tofa Levaopolo Talatonu: Ia e leai. Sa faapea e le i tali le Afioga i le Minisita, aua o lea pei sa tali mai i i le saunoaga a le Taitai o le Itu Agai, ia ae soia ia o le a matou alu ai faapena. Ae pau lava sina vaega lea lau Afioga, se maimau e, o le tele o a matou fesili ia e avatu, o lea e tali mai lava le Afioga i le Minisita, o lea e i totonu o Regulations o Tulafono Faatonutonu. Maimau e, pe ana aumai faatasi se i tali mai ai a matou fesili lea i le atoaga o mea ia.

FOFOGA FETALAI: Ia e le i fausia Roma i se aso se tasi, se i pasia muamua le tatou Tulafono ona aumai ai lea ma Tulafono Autu, ia ona tulai mai lea o le tulaga o le faatinoga o galuega.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Pulega o Taulaga 2014 i lona faitauga faalua.

FOFOGA FETALAI: E tusa ai ma le Tulafono Tumau, o le a tuuina atu le Tulafono Tau Faaofi o Teuteuga o le Tulafono o le Pulega o Taulaga 2014 i le Komiti o Galuega, Felauaiga ma le Siosiomaga mo le iloilo ma toe lipoti mai i le Fono Aoao i se Fonotaga o lumanai.

**TULAFONO TAU FAAOFI O TEUTEUGA O LE TULAFONO O LE
FAAPUTUGATUPE MO LE LUMANAI MANUIA O TAGATA 2015**

– faitauga faalua

FOFOGA FETALAI: Mo le silafia e lenei Palemene o le Tulafono Tau Faaofi lenei sa faia lona faitauga muamua i le aso 26 Ianuari 2015, ia tulai mai lau Afioga i le Palemia, le Minisita o Tupe.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 i lona faitauga faalua, ma ou te fia tautala faamalamalama i ai.*

Faaluaina e le Minisita mo Fesootaiga ma Faamatalaga Tekonolosi, ma le Minisita mo Tupe Maua.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ona ua taoto i lumamea le Tulafono Tau Faaofi e Teuteu ai le Tulafono o Faaputugatupe mo le Lumanai Manuia e ala i le siitia o fua faatatau aupito mauualalo pasene o saofaga a tagata e ona galuega ma saofaga a tagata faigaluega i totonu o le vaitaimi e lua tausaga. O le faamoemoe o le Teuteuga, ia mautinoa ai le maoae o faaputugatupe mo sui faisafaga mo le faatupeina o a latou penisione i le taimi e litaea ai. Ua taua ai e faapea, afai e pasia, o le a taua loa o le Tulafono Tau Faaofi o le Tulafono o Faaputugatupe mo le Manuia o Tagata 2015, ma o le a amata faamamaluina i se aso ua faamaotiina.

Lau Afioga i le Fofoga Fetalai, ia o le faapuupuuga lena o le Tulafono.

FOFOGA FETALAI: Ia e manatu o lea ua taatia i malae le saunoaga a le Afioga i le Minisita o Tupe e ala i le tatou Tulafono, ia e manatu foi ua malamalama le folasaga a le Afioga i le Palemia o le Minisita foi lea o Tupe.

Se i tulai mai le sui usufono mamalu mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. E pau lava sina mea lea e fia malamalama ai ona o le atugaluga lau Afioga i le Fofoga Fetalai, e matau atu o lea foi muamua, o lea foi na faataatia mai i se taimi e le i mamao atu se isi suiga o le Tulafono o le NPF. O le popolega, ona o lea afai o le a sii i luga i le 10% ia le contributions, ou te talitonu la ua tele foi tupe e maua i totonu o le NPF, peitai ane, o lea foi ua aumai le vaega lea faapea o le a....e le gata o le a tele le tupe o le a avatu i totonu, ae o le a pau ia le tupe e mafai ona loan ai ia tagata lautele tagata fai lafoga, o le talitonuga afai ua tele le contribution, ia e tatau pea ona taoto pea i luga o le vaega lea po o le 50% ea lea e i ai le mea e mafai ona nono ai ia tagata fai lafoga mai lana ia lava tupe, ae le o le pau mai lalo aua o lea ua faateleina seleni o le a mafai ona maua e le...

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le o taua lava ni mea nono i le Tulafono lea. Na o le pau lava le mea lea e taua, o le siitia o le saofaga, 1% po o le .01 le sene, pau lava lena. A sii le .01 le sene a le tagata, ua sau le .01sene a le fale faigaluega, a le siia lea, e leai foi se meaalofa a le fale faigaluega, pau lava lena, e tatou te le o talanoa i mea tau nonogatupe i i. Afai tou te fiafia i le sii lea ua sii ai tatou i le 10% ma tele ai a outou saofaga, e tatau foi ona outou malamalama i le mea lea.

FOFOGA FETALAI: Ia ou te manatu e vaelupeina le tatou talanoaga i lenei taeao, e manatu foi e tatau ona i ai le agaga o le fetuutuunai i le tatou Maota i lenei Tulafono ona ua tatou maitauina i lenei aso le lē atoatoa o le siufofoga o le Afioga i le Palemia. Ou te faamalulu atu i lau Afioga i le Palemia, ia ona o le tulaga i le vaai atu i le tulaga o lenei taeao sa i ai le lagona, o lo o maua pea le malosi i tulaga sa tatou feagai ai i fatia ua sola. Ae manatu o lenei taeao, o le a ou faia le faaiuga e tolopo le Tulafono lenei, e le tatau ona tatou tauavagameaina a o lo o faapena ona le atoatoa le siufofoga o lau Afioga, ina ia manino ma malamalama ai lenei Tulafono, ae taua finagalo o sui usufono, ua ou manatu ai, malie lau Afioga i le Palemia ma le mamalu o le Maota, ia o le a tolopo le Tulafono lenei se i i ai se taeao aena. O nisi foi Tulafono lau Afioga i le Failautusi o le Fono o lo o aafia ai le Minisita o Tupe o le Afioga i le Palemia, ia ua tolopo ina ne i meaane ua tatou agai i se isi tulaga, ae tatou sailiili malosi ina ia maua le malosi o le Taitai o le Malo.

Se i tulai mai le sui usufono mo Faleata Sisifo.

Tofa LEALAILEPULE RIMONI AIAFI: Lau Afioga i le Fofoga Fetalai, ia ne i te i lau Afioga ua...ou te talitonu ua uma le Tulafono, na o le lua lava suiga lea e i ai. O lou tulai atu, faafetai i le Afioga i le Palemia, o Tulafono ia e lelei, e pau lava tagata e ono tetee i le Tulafono lenei o le afaipisinisi aua o latou....afai o la ua fiafia e fai, aua o tatou nei o tagata faigaluega, o mea ia e moomia, pe tuutuu i luga le saofaga e tua i ai ia pasene e tua i ai i aso e moomia ai le fesoasoani pe a litaea, ae o le Tulafono ia, e ave i ai le lagolago a lenei sui usufono. Ma le faaaloalo lava.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le tulaga lena na ou tulai atu ai, e faigofie lava le Tulafono, a o le 1 lava la pasene e sii, ina ia aumai ai foi le pasene a le fale faigaluega. O lea e tatou te manuia ai tatou nei o le Maota lenei, ua leva ona sii tatou i le 5% i le 10%, e moomia foi la e le afaigaluega le sii o latou, ia tele....ma tele ai le latou seleni, ua uma le Tulafono.

FOFOGA FETALAI: Ia o le a tuu atu loa le tatou Fesili.

Afioga Hon Palusalua Faapo II: Lau Afioga i le Fofoga Fetalai....

FOFOGA FETALAI: Ia.

Afioga Hon Palusalua Faapo II: Ona o lea ua e saunoa mai e toe tolo a tatou Tulafono a le Afioga i le Palemia, o lea la ou te nofo ma ou tilotilo atu i le Sui Palemia, o ia e tatau ona fesoasoani i le Afioga i le Palemia, silasila i

ai, o le mea lena ua ala ai ona ou fesili, leaga o lea ou te vaai atu i le tatou Pepa o Galuega, o le tele ia o Tulafono a le Afioga i le Palemia. O le a ea le aoga o le Sui Palemia lau Afioga?

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga, o lea lava ou te malosi lou leo, ana faapea ua ou gugu, ia ua ou fautuaina le Sui Palemia e tulai atu.

FOFOGA FETALAI: Ia malie ia, se i tulai mai lau Afioga i le Sui Palemia.

Tofa Hon Fonotoe Nuafesili Pierre Lauofo (Sui Palemia): Lau Afioga i le Fofoga Fetalai, o mea faapea o lea ou te lagolagosua atu i le Afioga i le Palemia, leaga o lea sa tuualalo atu foi i nai isi tatou Tulafono lea ua maea, ma faamanatu atu ai, o le Taitai o le Itu Agai lea foi sa Minisita i le SPA. Silasila la i ai o lea lava e faapena le faiga o le galuega. Ae tusa ai pei ona tulai mai, leaga o lea e maua, a, o lea ua faamau i a tatou Pepa ia e aumai, ona o lea e sau le suafa o le Afioga i le Palemia ia Tulafono Tau Faaofi ia e faagasolo i le taimi nei. E le mafai la ona toe fesui ai faafuasei i i, ua avatu fua lou igoa, leaga o lea e aafia i faamaumauga o le Fono, silasila la i ai, o lea e aafia i faamaumauga o le Fono, ana faapea e mafai nei lava ona toe tasui i le taimi lenei, Palu, o au na ou sauni mai lava i le fa tausaga talu ai i le mea lenei, e le tuumamaina le mea lenei, ioe, leaga e faapena le faiga o le Vaega Faaupufai lenei, ioe, e faapena e galulue felagolagomai.

FOFOGA FETALAI: Malo saunoa i lau Afioga i le Sui Palemia.

Afioga Hon Palusalua Faapo II: Lau Afioga i le Fofoga Fetalai, e tatau ona ou faasaoa le saunoaga a.....ou te le faitio foi i ai leaga e fou, e fou i le Maota. E tusa lava pe sau le faasologa i le Afioga i le Palemia i totonu i i, a o le faagasologa o galuega, afai ae....mo le mea o le tofa fetuutuunai, ioe, a o lou saunoa mai, seiloga e pipii lou igoa i i, ia na o lou faanoanoa lava, e faanoanoa lava ia oe.

Tofa Hon Fonotoe Nuafesili Pierre Lauofo: Ia silasila la lau Afioga i le Fofoga Fetalai i le sese o le mea lea e sau. O le mea lea ou te agai atu i ai, leaga o mea na o lea e aumai i Tulafono Tumau o le Maota. Ia se i silasila la i le leva ona e i le Maota ae e te le malamalama i Tulafono Tumau, e agai lava le sui usufono ia, o ai lava le Afioga i le Minisita o lea e aumai le suafa i i i Tulafono Tau Faaofi, o lena, o ia lena e saunoa i totonu o le Maota e tusa ai ma le Tulafono Tau Faaofi. E leai se mea e faigata ai lena mea.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga pe aumaia le fesili o lea ua uma.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 i lona faitauga faalua.

FOFOGA FETALAI: E tusa ai ma le Tulafono Tumau, o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloiloina ma toe lipoti mai i le Fono Aoa o se fonotaga o lumanai.

TULAFONO TAU FAAOFI O FUAINUMERA FAAMAUINA 2014
– iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai lau Afioga i le Taitaifono o le Komiti o Faafoga tau Pulega a le Malo.

Tofa Hon TUUU ANASII LEOTA (Taitaifono o le Komiti o Faafoga tau Pulega a le Malo): Faafetai i lau Afioga i le Fofoga Fetalai, ae ua ou tulai atu i lenei taeao fou lau Afioga e faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Fuainumera Faamauina 2014 faatasi ma Teuteuga ma Faasaoga.*

Faaluaina e se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.

FOFOGA FETALAI: Ou te faasilasila atu ua faamaonia nei e le Fono Aoa le Lipoti a le Komiti o Faafoga tau Pulega a le Malo i le Tulafono Tau Faaofi o Fuainumera Faamauina 2014.

O le a sagai atu le Fono Aoa i le Iloiloga Auiliili o le Tulafono Tau Faaofi o Fuainumera Faamauina 2014.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faamoemoe o le Tulafono.

Faamaonia.

FUAIUPU 3: O le Tulafono e noatia ai le Malo.

Faamaonia.

FUAIUPU 4: Faamatalaina o uiga o upu.

Faamaonia.

FUAIUPU 5: Faavaeina o le Ofisa.

Faamaonia.

FUAIUPU 6: Galuega tauave lautele ma le mafai ona tali atu.

Faamaonia.

FUAIUPU 7: Galuega tauave faapitoa.

Faamaonia.

FUAIUPU 8: Malosiaga o le ofisa.

Faamaonia.

FUAIUPU 9: Faaagāina o le Tulafono o Galuega a le Malo 2014.

Faamaonia.

FUAIUPU 10: Komiti Faatino Faufautua o Fuainumera Faamauina.

FOFOGA FETALAI: O lo o i ai le Teuteuga a le Komiti i le Fuaiupu 10 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa Hon TUUU ANASHI LEOTA: Lau Afioga i le Fofoga Fetalai ou te faatu le Teuteuga i le Fuaiupu 10 e faapea:

“TEUTEUGA:

- i) Fuaiupu 10(1)(a)-*Ia aveese le upu “Minisita” ma suia i le upu “Le Ao o le Malo i le faia i luga o le fautuaga a le Kapeneta” ma faitauina ai le faafuiauupu (1)(a) e faapea:-*

- (1) **Ua faavaeina le Komiti Faatino e aofia ai sui auai nei:**

(a) **O se Taitaifono e tofia e Le Ao o le Malo i le faia i luga o le fautuaga a le Kapeneta mo se vaitaimi e tolu (3) tausaga ma e agavaa mo le toe tofiaina.”**

ii) Fuaiupu 10(2)- *Ia aveese le upu “Minisita” ma suia i upu “Le Ao o le Malo i le faia i luga o le fautuaga a le Kapeneta” ma faitauina ai le (2) e faapea:-*

(2) **O sui auai ua taua i le faafuaiupu (1)(c) e tofia e Le Ao o le Malo i le faia i luga o le fautuaga a le Kapeneta mo se vaitaimi e lua (2) tausaga ma e faapena foi ona agavaa mo le toe tofiaina.”**

iii) Fuaiupu 10(5)(b)-*Ia aveese le upu “Minisita” ma suia i upu “Le Ao o le Malo i le faia i luga o le fautuaga a le Kapeneta” ma ia aveese upu “ai le Minisita” ma suia i upu “ai le Kapeneta” ma faitauina ai le faafuaiupu (5)(b) e faapea:*

“(b) ua aveesea mai le tofi e Le Ao o le Malo i le faia i luga o le fautuaga a le Kapeneta, i se amioga lē pulea po o ua le atoatoa le malosi o le tino ua faamaonia i se tulaga ua faamalieina ai le Kapeneta i luga o mafuaaga talafeagai; po o”

Ma le faaalalo.

Tofa LEVAOPOLO TALATONU: Lau Afioga i le Fofoga Fetalai.....

FOFOGA FETALAI: Tulai mai le sui usufono mamalu mo Gagaemauga Nu. 2.

Tofa LEVAOPOLO TALATONU: E fesili atu lava i le vaega 10(iii) lea e faapea mai, “e le agavaa ai se sui usufono o le Palemene.” Ae ou te manatu lau Afioga i le Fofoga Fetalai, e tataua lava ona agavaa le sui usufono o le Palemene ae na o le Itu Agai, ina ia mataitu lelei, e sao fuainumera ia e faaoga lea e calculate ai le tamaoaga o le atunuu.

FOFOGA FETALAI: Ia o lea ua maua le fesili a le sui usufono mamalu. Se i tulai mai le sui usufono mo Faleata Sisifo.

Tofa LEALAILEPULE RIMONI AIAFI: Ou te fia fesili foi i le vaega lea o le Fuaiupu 10 lau Afioga i le Fofoga Fetalai.

Muamua, o le filifiliga o le Taitaifono, o lea la ua faatuina mai e le Komiti ia fesuiaga tetele nei, aua o lea pei e matau, o le Tulafono lea o lea e mulimulitaiina ia standardize i isi foi Tulafono i le filifilia o Taitaifono. Afai la o le a mulimulitaia finagalo o Komiti, o lona uiga, o le a faapea foi la ona....po o lona uiga la o le a tulaga ese la le Tulafono lea ma isi Tulafono.

O le isi mea lau Afioga, o lea ou te tilotilo i le Board lea, is like an Advisory Board, manatua foi o le standardize a Government Body o le Ministry e le o se SOE, a, is state as an Enterprise e ese foi le latou Tulafono. O le Board lea i lau tilotilo na o le faa-tasi ona fono i le tausaga pe a moomia, is an Advisory Board, o le Fono Fauaufutua e fautuaina le Minisita ma le CEO i ni mea foi ia i le faiga o le galuega is not, e le o se Komiti Faatonu pei o isi Komiti Faatonu lea e faatino i SOES, o Matagaluega Tumaoti a le Malo, o lau faitau lau Afioga, pei e ese mai le mea lea na o se Fono Fauaufutua, e leai se eseese ma le Komisi foi lea i lalo o le Land Board o mea faapena.

O le isi la mea, e pau la le mea lea na ou fia fesili ai i le Afioga i le Taitaifono, o tofiga o term o le Board, o lea e faapea mai e tolu tausaga o le Taitaifono ae tai lua tausaga o members, ia manatua foi la pei ona ou fai atu, o isi Komiti aua e le tutusa ma le Komiti lea, o lea e alu lava i terms masani le umi e tatau ona i ai, o le vaega la lea faapea mai e tolu tausaga o le Taitaifono ae lua tausaga o le tagata o le Komiti. I lou la talitonuga, sa tatau ona faatutusa le umi o le term o le Taitaifono ma le term o tagata o le Komiti, ia tai tolu tausaga ia talafeagai ai, ae i lou talitonuga lau Afioga, ou te fesiligia le suiga ia ua tuuina mai e le Taitaifono ma le Komiti, ona o faiga masani ma tulaga o mea ia. Ma le faaaloalo lava, faafetai.

FOFOGA FETALAI: Malo. Ia tulai mai lau Afioga i le Taitaifono.

Tofa Hon TUUU ANASII LEOTA: Faafetai, e matagofie fautuaga ua tuuina mai e le Afioga i le sui usufono aemaise o le Itu Agai. E i ai lava mafuaaga na fausia ai fautuaga nei, ma e faamalulu atu o le sui usufono lava o le sui usufono, e le faapea a Itu Agai ona talafeagai lea ona tofia, leai e faamalulu atu. O lea foi ua fulisia i ai ia le Komiti ma le fautuaga foi ua ioe i ai le Faigamalo ma...ia o mea lava ia e tatou te agai ai i luma. E faamalulu atu, tatou o ia faapea.

Tofa LEALAILEPULE RIMONI AIAFI: Lau Afioga i le Fofoga Fetalai, ne i te i ua faaataata a lafoga manatu i lau Afioga. O lea na tatou talanoaina tonu ananafi faamalamalamaga foi a le Loia Sili interpreting i le faauigaina o Tulafono. O le mea lea lau Afioga leaga afai ae tatou suia nei le vaega lea o le Tulafono pei ona fautuaina e le Komiti, e le afaina e leai se....ae o lona uiga o le a inconsistent ai ma le tele o Tulafono ua uma ona fautuina e le Malo. Ma le faaaloalo lava.

FOFOGA FETALAI: O lea ua maua le finagalo o le sui usufono, ia le sui usufono mo Gagaemauga Nu. 2.

Tofa LEVAOPOLO TALATONU: Lau Afioga i le Fofoga Fetalai, e faamalulu atu leai, faafetai i le Afioga i le Taitaifono, ae i ai lava le taua o sina au tamai fesili lea na avatu, ae pei e foliga mai e le o maua lelei mai e le Taitaifono. E a pe a tulai mai le Sui Taitaifono po o ona mateia mai le mea lea e taumafai atu pe afai e faaletonu le Taitaifono.

FOFOGA FETALAI: Ia malie ia le sui usufono mo Gagaemauga Nu. 2, ona o lea ua pasi le tatou Teuteuga, e manatu foi o lea ua faamalulu mai le Taitaifono e le uma le fai aso o le Alii, e i ai foi taimi e aena ia ona aumai lea

o lo oulua finagalo, ae o la ua tusingi e le Taitaifono ma se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi o la ua fesoasoani e faamau ia a oulua fautuaga ia ua aumai.

Faamaonia le Teuteuga.

Faamaonia le Fuaiupu 10 e pei ona Teuteuina.

FUAIUPU 11: Galuega tauave a le Komiti Faatino.

Faamaonia.

FUAIUPU 12: Fonotaga ma komiti.

FOFOGA FETALAI: O lo o i ai le Teuteuga a le Komiti i le Fuaiupu 12 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa Hon TUUU ANASII LEOTA: Lau Afioga i le Fofoga Fetalai ou te faatu le Teuteuga i le Fuaiupu 12(6) e faapea:

“TEUTEUGA:

Ia faaofi upu “i le i ai faatasi ma tuutuuga o le faasologa o galuega”, i le tuana'i ai o le upu “tofia” ma a o lumanai ai upu “so o se”, ma faitauina ai le Fuaiupu 12(6) e faapea:-

“(6) E mafai e le Komiti Faatino ona tofia i le i ai faatasi ma tuutuuga o le faasologa o galuega, so o se komiti e tuuina atu Fautuaga i le Komiti Faatino e uiga i Mataupu e talafeagai i lalo o leni Tulafono e faapea:”

Ma le faaaloalo.

Faamaonia le Teuteuga.

Faamaonia le Fuaiupu 12 e pei ona Teuteuina.

FUAIUPU 13: Faamau Fuainumera a le Malo, galuega tauave ma malosiaga.

Faamaonia.

FUAIUPU 14: Ofisa Sili Lagolago o Pulega ma isi tagata ofisa.

FOFOGA FETALAI: O lo o i ai le Teuteuga a le Komiti i le Fuaiupu 14 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa LEALAILEPULE RIMONI AIAFI: Lau Afioga.....

FOFOGA FETALAI: O le a le Fuaiupu le sui usufono mo Faleata Sisifo?

Tofa LEALAILEPULE RIMONI AIAFI: O le Fuaiupu 14 lau Afioga, a o lea la o le a ou faatali se i maea le Teuteuga.

FOFOGA FETALAI: Ia o le a aumai le Teuteuga ona tulai mai lea o le sui usufono mamalu. Tulai mai lau Afioga i le Taitaifono.

Tofa Hon TUUU ANASII LEOTA: Lau Afioga i le Fofoga Fetalai ou te faatu le Teuteuga i le Fuaiupu 14 e faapea:

“TEUTEUGA:

Ia aveese atoa le fuaiupu 14 ma ia toe faanumera fuaiupu o le Tulafono Tau Faaofi e tusa ai ma le faasologa.”

Ma lou faaaloalo.

FOFOGA FETALAI: Le sui usufono mo Faleata Sisifo.

Tofa LEALAILEPULE RIMONI AIAFI: Lau Afioga pe afai e sao lau faalogo o lea ua saunoa le Afioga i le Taitaifono e aveese atoa le Fuaiupu 14. Ou te fia malamalama la po o le a le mafuaaga? Aua o lona uiga, o lea ua faapea o i ai se feteenaiga ma le Tulafono a le PSC, ae o lou talitonuga, o le matua manaia lava o le vaega lea o le Tulafono. Afai o lea ua aumai i i le malosiaga i le CEO po o le Statistician e filifili ai e ia tagata faigaluega, amata mai i le CEO level e tau i lalo, ia o le mea lena e tatau ona i ai pe afai o le mea lena e tatau ona i ai, e manatua o Tulafono nei e le faapea na tusi i ni aso se lua pe tolu aumai ai, na uma faataamilo atoa, ave i le Kapeneta ave i le Loia Sili e draft ia po o ai ni tagata na fesoasoani i ai. Ia a o lea la ou te fia iloa la lau Afioga, ma ou te lagolagoina le Fuaiupu 14, na pau lava lea o le mea sa fesili i ai, nei i ai se feteenaiga ma le Tulafono o Tagata Faigaluega a le Malo ona o latou lea e i ai le tofiga o ACEO, ae afai o lea ua manino lava i lalo o Tulafono ia e filifili e le Matagaluega le latou ACEO ma tagata faigaluega uma, e ave i ai lau lagolago. Ma lou faaaloalo lava.

FOFOGA FETALAI: Malo. Ia, Toeolesulusulu.

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, e faapea foi se manatu lau Afioga, ou te lagolagoina foi, e fia maua se faamalamalamaaga mai le Komiti i le vaega ua aveese ai, ona e talitonu foi lou sui usufono e taua tele le suiga lea i le Fuaiupu 14 lea o lo o aumai a o lea ua faamoemoe e aveese ai.

FOFOGA FETALAI: Tulai mai lau Afioga i le Taitaifono o le Komiti.

Tofa Hon TUUU ANASII LEOTA: Faafetai i Afioga i sui usufono na fesiligia le mataupu lea. O lea lava na toe tali e le sui usufono mo Faleata Sisifo lana faamatalaga umi lea na fai, i le tulaga lea. Ma e pei lava ona taumafai atu, e lei fausia lava Roma i se aso e tasi. O le tulaga lea na i ai le teuteuga lea a le Komiti ina ua faamalieina le Komiti, ina ua feutagai ma le Loia Sili aemaise foi o le Afioga i le Alii Pule na tofia i lalo o le Tulafono Tau Faaofi lenei. Ma lou faaaloalo lava.

FOFOGA FETALAI: Se i tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI: Ia manatua foi la afai... i le taimi lenei, o tagata faigaluega i lalo ifo o le ACEO e faasolosolo ifo agai i lalo, o lea ua i ai le authority i Matagaluega e filifili ai e latou a latou tagata faigaluega. Afai la e aveese na o Ofisa Sili Lagolago, e tatau lava la ona i ai isi tagata faigaluega aua e le faapea o le a tofi uma mai e le PSC tagata faigaluega uma a le Matagaluega. E tatau ona i ai se... o le aia lenei ma le pule a le Statistician ia ma lana... afai o lea ua i ai ma le Board lea, le Advisory Board, o lona uiga o latou e tatau ona filifilia mea ia. O le mea la lenei o lea e fia malamalama ai lava, ae afai ua toe fautua mai le Loia Sili e aveese, o le mea la lenei o lea ou te fia malamalama ai pe aisea. Ia ma le faaaloalo lava.

FOFOGA FETALAI: Ia, o lea ua maua le finagalo o le sui usufono. E manatu foi o lea ua...

Se i tulai mai au Afioga i le Sui Palemia.

Tofa Hon FONOTOE NUFESILI PIERRE LAUOFO: Lau Afioga i le Fofoga Fetalai, sa manatu o lea ua maea avanoa e lua o le sui usufono lea sa tulai mai. A o le tulaga lea, na o le aveese lava o le Fuaiupu 14 ona foi loa lea o le process lea e faaoga i le taimi nei e le PSC, lea e faaoga uma e Matagaluega uma. Ia o le tali atu lenei, e puupuu lava.

Tofa LEALAILEPULE RIMONI AIAFI: Lau Afioga...

FOFOGA FETALAI: Malie le sui usufono, silasila foi o lea e tau tata atu i le tatou Tulafono Tumau, o lea ua maea le lua avanoa o e tulai mai, o lea foi ua saunoa le Afioga i le Taitaifono.

Tofa LEALAILEPULE RIMONI AIAFI: Faafetai, ae sese le mea la e saunoa mai ai le Sui Palemia. E sese. Ma lou faaaloalo lava. O le mea lena e leaga ai le le faitau i le Tulafono Tau Faaofi...

FOFOGA FETALAI: Ou te manatu o le a le faafinauina lea tulaga, ou te manatu o lo o manino ma malamalama le folasaga a le Taitaifono. Malilie sui usufono mamalu e le i tago faatumutumulima le Taitaifono ma le Komiti, o lea na taua na oo lava i le Loia Sili, fesiligia le tulaga taua e tatau ona i ai, ma le tulaga tonu e tatau ona taoto ai le Tulafono Tau Faaofi, o lea ua i ai le fautuaga lea ua tuuina mai.

Faamaonia le Teuteuga.

Faamaonia le Fuaiupu 14 e pei ona Teuteuina.

FUAIUPU 15: Tulaga tutoatasi.

FOFOGA FETALAI: Se i tulai mai le sui usufono mamalu mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai. O le faafesili i le Taitaifono ma le Komiti ona e faitau atu i le vaega tonu lea o le Tulafono Tau Faaofi ua tele le power lea ua ave i le pule tutoatasi a le Government Statistician, e tusa ai ma le iloiloga a le Komiti, pe ua talafeauga lea vaega e tusa ai ma le ave uma i le tagata e toatasi pe i ai nisi e tatau ona ave uma i ai, atonu foi o lea e i ai le Advisory Board. Pe i ai se feutanaiga ma le Advisory Board, peitai ane e vaai atu o le Pule Toatasi a le Statistician lea e faia uma ai faaiuga. Pe ao ona tuu i ai se vaega foi lea e i ai se fautuaga mai nisi o Matagaluega aemaise foi le Advisory Board faamolemole.

FOFOGA FETALAI: Se i tulai mai le Taitaifono o le Komiti.

Tofa Hon TUUU ANASHI LEOTA: Lau Afioga i le Fofoga Fetalai, faafetai mo le faafesili a le sui usufono. Se ua faamalieina atoa uma lava le Komiti i tulaga ia, sa matou vaavaai lava i tulaga ia, o mea ia tatou te popole i ai ne i ave se malosiaga atoatoa i se tagata se toatasi, ae peitai ane ina ua silasila totoa i ai le Komiti, ua talafeagai lava le mea lea. Ma lou faaaloalo lava.

FOFOGA FETALAI: Se i tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, a lea e manino lava le Fuaiupu 15, “E noatia le alii pule po o le Government Statistician i isi fuaiupu ma isi aiaiga o le Tulafono Tau Faaofi lenei.” Lea la e saunoa le sui usufono lea sa fesili, a faapefea le Komiti

Faufautua lea e i ai. O le uiga la o le tulaga lena e i ai, e noanoatia le Pule Sili i le faatinoga o tiute ia, e le faapea la e tele tele se power o i ai.

Faamaonia le Fuaiupu 15.

FUAIUPU 16: Aia tatau e faaalua ai manatu e uiga i fuainumera faamauina.

Faamaonia.

FUAIUPU 17: Lipoti faaletausaga.

Faamaonia.

FUAIUPU 18: Taiala faavae lautele.

Faamaonia.

FUAIUPU 19: O faamatalaga e ao ona faaaogaina mo na o faamoemoega tau fuainumera faamauina.

Faamaonia.

FUAIUPU 20: Maualuga o le tulaga agatapuia.

Faamaonia.

FUAIUPU 21: Faatapulaaaina o le faailoaina atu o nisi auiliiliga faatagaina.

Faamaonia.

FUAIUPU 22: E lē mafai ona mauaina mai pe faailoaina atu faamatalaga agatapuia.

Faamaonia.

FUAIUPU 23: Tautoga po o tautinoga a tagata ofisa e faasino i tulaga agatapuia.

Faamaonia.

FUAIUPU 24: Tautoga po o tautinoga a isi tagata.

Faamaonia.

FUAIUPU 25: Galuega tauave tau fuainumera faamauina a isi faalapotopotoga a le Malo.

FOFOGA FETALAI: O lo o i ai le Teuteuga a le Komiti i le fuaiupu 25 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa Hon TUUU ANASII LEOTA: Lau Afioga i le Fofoga Fetalai ou te faatu le Teuteuga i le Fuaiupu 25(3) e faapea:

“TEUTEUGA:

Fuaiupu 25(3)

Ina ia faaofi upu “mo se Fautuaga” I le tuanai ai o upu “Komiti Faatino” ina ia faitauina ai le (3) e faapea:

“(3) Afai e le o malilie i ai le Minisita ma le Minisita o nafa ma se faalapotopotoga a le Malo, e ao loa i le Minisita ona faasee atu le Mataupu i le Komiti Faatino, mo se Fautuaga.”

FOFOGA FETALAI: Tulai mai Levaopolo.

Tofa LEVAOPOLO TALATONU: Lau Afioga i le Fofoga Fetalai, se faamolemole lava lau Afioga i le Taitaifono se i e faamanino mai lava se mafuaaga o le suiga lea. Aua pei e foliga mai i a tatou faiga faavae pei e foliga mai o le Minisita na te faia faaiuga mulimuli i lalo o le fautuaga a le Komiti. A o lea ua ou vaai atu nei a faapea e le mafai e Minisita ona soalaupule se mataupu ona toe faafoi lea i le Komiti Faafoe e fai mai ai faaiuga. Ua tau le manino lelei lau Afioga i le Taitaifono i le vaega lea o le suiga o le Tulafono Tau Faaofi faamolemole.

FOFOGA FETALAI: Se i tulai mai le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, a faapea e i ai se tulaga e le o faapea ua tulai mai se maliega i le va o Minisita nei, o lea ua faatulai mai le Teuteuga ona lafo lea i le Komiti

Faafae mo se fautuaga, ona aumai lea o le fautuaga, aua e faapena le faiga o galuega a le Malo. E faalagolago foi Minisita i fautuaga mai Komiti Faafae ma le afaigaluega a le Malo ma Faauluuluga o Matagaluega a le Malo, ona aumai ai lea o fautuaga ona faapena lea ona fai i ai faaiuga. O se fuafuaga lelei lau Afioga.

FOFOGA FETALAI: Ia, se i tulai mai lau Afioga i le Taitaifono.

Tofa Hon TUUU ANASII LEOTA: Leai na ona ou fia fesoasoani atu i le mataupu, o le mea masani lava. O mea masani lava. O lea foi e manino lava i i, e ao loa i le Minisita ona faasee atu i Komiti latou te aumaia le fautuaga. Ma le faaaloalo.

Tofa LEVAOPOLO TALATONU: Lau Afioga faamolemole, ou te le iloa la po ua i ai ni nai suiga o faiga faavae i le faiga o mataupu ia i totonu o so o se Matagaluega. Aua o le mea moni lava so o se mataupu e lotea i Matagaluega see atu i Komiti Faafae ona avatu lea i luga o le Minisita. Ae pei la e foliga mai o lea ua alu solomuli si a tatou amio ua alu i le Minisita toe solomuli i tua. E pei o le mea lena o lea e avatu ai le fesili.

FOFOGA FETALAI: Ia malie ia le saunoaga a le sui usufono mamalu o lea ua maua le saunoaga a le Sui Palemia. E manatu foi o lea ua malamalama le saunoaga a le Taitaifono, e le o ni faiga fou, o le a toe fevailiai le tulaga o mea e le maua ai le femalamalamaaiga, ona avatu foi lea i le vaitele e soalaupule toe aumai. Se i tulai mai lau Afioga i le Taitaifono.

Tofa Hon TUUU ANASII LEOTA: Leai o le mea lava na ona fia faasao, pe a feteenai. E feteenai loa se tulaga faapea ona see lea i le Komiti e aumai ai se fautuaga. Ma le faaaloalo.

Faamaonia le Teuteuga.

Faamaonia le Fuaiupu 25 e pei ona Teuteuina.

FOFOGA FETALAI: Ia, e manatu leaga o lea ua tatou taunuu tonu i le tatou taimi malolo, ua ou manatu ai ua vaeseuga foi le tatou taeao, o lona uiga ua tataua ona vavae foe ae tatou agai se i fai se malu taeao ma tali le sua, ona tatou toe taliu mai lea i le tatou malologa masani o le taeao.

E faasilasila atu o le a faataatia ese Taulumaga a le Fono Aoao mo lana malologa masani o le taeao.

Na faataatiaese Taulumaga a le Fono Aoao mo lana malologa masani i le itula e 10:45 i le taeao ma toe faaauau i le itula e 11:37 i le taeao.

FOFOGA FETALAI: E momoli atu le agaga faafetai i lenei vaega o le aso, talitonu o lea ua maua le faasiliga malosi e ala i feau, tiute ma galuega sa tatou feagai ai i le taeao. O lea ua tatou taunuu mai i le taimi e toe amataina ai le tatou galuega, ma e talitonu o lea ua maea palega auau le taliga o le sua ma ua sao i alo la outou tautega, maua foi lo outou malosi e faaauau ai le tatou galuega i lenei vaega o le taeao.

E faia le tatou malologa o lo o faagasolo le iloiloga o le tatou Tulafono Tau Faaofi, ma o lea ua tatou oo mai i le Fuaiupu 26.

FUAIUPU 26: O le Faamau Fuainumera a le Malo e faia tusiga igoa o le faitau aofai o tagata, fale ma faatoaga.

FOFOGA FETALAI: Ia, se i tulai mai le sui usufono mamalu Lealailepule.

Tofa LEALAILERPULE RIMONI AIAFI: Lau Afioga i le Fofoga Fetalai, faafetai lava mo le avanoa, faafetai foi ua tali le sua i le mamalu o le Palemene, ua maua foi se faasiliga malosi aua le faaauauina o le tatou galuega. A ua ou tulai atu i le Fuaiupu lea lau Afioga ona e maitauina e lima tausaga le faitauaofai o tagata, ae tai 10 tausaga le faitauaofai o faatoaga. Muamua lau Afioga, pe le o i ai se feteenaiga ma le census foi po o le faitauaofai a le Matagaluega o Faatoaga latou. O le isi mea lau Afioga, pe le taugofie ma talafeagai le fai faatasi, aua o lea e asia uma lava aiga uma ma lavea atu ai i fesili i le vaega lea, aua e le faapea e faifaatoaga uma tagata. O le uiga o lau faamatalaga lau Afioga, o le tele o meatoto ma lafumanu ma mea faapena, e le oo i le tai sefulu tausaga o iai pea, e le iloa pe i ai nisi e fai, lua, tolu, lima tausaga. Afai e fai nei sata faatoaga sefulu afe tiapula ae oo i le tausaga lea ua leai se mea. Po o le a la le mafuaaga e mafua ai ona faatino. Ae afai na o farmers, o le uiga lena o lau tala, pe na susesue e le Komiti le mafuaaga e ala ai ona lima tausaga le isi census ae sefulu tausaga le vaega lea a le Matagaluega o Faatoaga. Pe le tagai ane le Komiti pe le tataua ona fai faatasi ona o le umi o tausaga o tuu ai, pe na fesiligia foi le Matagaluega o Faatoaga pe le o faia foi e latou lea function, aua o le latou matafaioi lea, ona fesootai lea o latou ia i fuainumera. Ma le faaaloalo lava. Faafetai.

FOFOGA FETALAI: Malo faafetai. Se i tulai mai le Taitaifono.

Tofa Hon TUUU ANASHI LEOTA: Faafetai lau Afioga i le Fofoga Fetalai. O le mea lea ou te lelei ai le sui usufono lea o le ala o le mafaufau. Ae manaia lava lona finagalo, ae silasila foi, e silimusa lava i le Komiti vaega ia, o le mea sa sau ai, sa sailiili ma fai. O le vaega tonu lava lea ua oo i ai, o le mea sili lava lea ona lelei, o lea ua faataoto atu. Lau Afioga, ua uma ona faitau e le Komiti ma auiliili ma vaavaai Tulafono uma ua lelei atoatoa ia te au. Ae faanoanoa i sui usufono nei i le fesili mai pea i Tulafono Tau Faaofi, ae afai e i ai lava se isi e le o toe manino, ona sau lea ma te talanoa i tua. Ae o le mea ato ua i ai le Tulafono Tau Faaofi, ua lelei ma atoatoa lau Afioga. Ma le faaaloalo lava.

FOFOGA FETALAI: O le a le fuaiupu Levaopolo?

Tofa LEVAOPOLO TALATONU: O le fuaiupu lava lea e tasi lau Afioga. Pei e tasi lena vaega e tau avatu ai foi se lagona, e pei o le tau e faatino ai vaega ia o tusigaigoa ma mea ia faapea, tatou te tilotilo i ai i le tulaga o le faasaoina ai o tatou seleni.

A o le mea lea e saunoa i ai le Taitaifono faapea ma te talanoa i tua, e faamalulu atu i lau Afioga i le Taitaifono, e le faia i lalo o ni laau upufai a le Malo lenei, e fai i totonu o le Palemene. O le mea lena e fia faasao atu i le Taitaifono.

FOFOGA FETALAI: O lea ua maua le finagalo o le sui usufono.

Tofa LEALAILEPULE RIMONI AIAFI: Pei o le mea lea sa ou taua, pe na fesiligia e le Komiti, aua i lou talitonuga, e fai foi e le Matagaluega o Faatoaga le vaega lea. E le faapea la e faalagolago tele, afai e manao lava latou e fai se latou independent, se latou lava matafaioi, ae tatau la ona i ai se fesootaiga a latou ma le Matagaluega o Faatoaga, aua ou te talitonu, e more.... e sili atu ona talafeagai ma sao faamaumauga la e i le Matagaluega o Faatoaga i lo latou. E i ai lou talitonuga, e faasaoina ai foi resources a le Malo ma le taimi alu. Ae lau Afioga i le Taitaifono, e ala ona ou fesili, manatua tasi lea tagata o lea ua faatu lana Vaega Faaupufai? O i la e faalogologo ai lou sui usufono pe ono taitai. Ma le faaaloalo lava.

FOFOGA FETALAI: Mo le faasaoina o le taimi o le Taitaifono, se i tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, e taua le mataupu lea e saunoa i ai le sui usufono aemaise lava i le va lea o le faamauina o fuainumera i Matagaluega taitasi. Silasila foi lau Afioga i le Fofoga Fetalai, o se tasi foi o Fonotaga ua maea atu sa fai foi sina vevesi ai i le vaega lea, ona e aumai faamaumauga a le Ofisa o Fuainumera, e eseese ma fuainumera a le Matagaluega o Faatoaga, pei ona i ai se eseese i le fonotaga na mavae atu nei. O lea la e taua ona e i ai vaega e fua i ai faamaumauga a le Vaega lea o Fuainumera, e i ai foi vaega e fua i ai le Matagaluega o Faatoaga. E pei la o le autu lena o le manatu, e tatau lava ona tagatagai Matagaluega nei e lua po o le a le faatinoina tonu lava, po o ai o le vaega lea e faasino tonu lava i ai, pe tatau ona talatalanoa i ituaiga criterias nei e faatino ai. O se faataitaiga lau Afioga ina ia faamalamalama ai le mataupu lenei, e i ai isi faitauga, mo se faataitaiga a faitau le aofaiga o manupapalagi i totonu o Samoa, a o atu la le Ofisa o Fuainumera Faamauina, e faitau ai lava ma manupapalagi nei e noanoa a aiga taitasi. A alu atu... ou te le iloa la pe lavea ai ma le faitau a le Matagaluega o Faatoaga, ona aumai ai loa lea o fuainumera ia ua eseese. E pei la o le uiga lena ou te faatauaina ai le manatu pei ona faaalua, e tatau ona i ai ni criterias e faataatitia ina ia fua i ai le galuega lea ina ia sao ma lelei fuainumera e aumai i totonu o le Maota Fono. Ma le faaaloalo lava.

FOFOGA FETALAI: Se i tulai mai le Afioga i le Minisita mo Fuainumera Faamauina.

Afioga Hon LAUTAFI FIO SELAFI PURCELL (Minisita mo Fuainumera Faamauina): Faafetai i lau Afioga mo le avanoa. Faafetai foi i sui usufono mamalu sa latou laga lea mataupu, lea sa saunoa manino lava le Taitaifono o le Komiti, ua maeaea uma ona latou tilotilo ma silasila i vaega uma nei, ae paga lava lea, o le a toe avatu lava se faaopoopoga e fesoasoani atu i le Komiti i lalo o le Matagaluega lenei o Fuainumera Faamauina, lea ua i lalo nei o lau vaaiga. O le tulaga lea sa tulai mai i le feeseeseaiga lea sa talanoa muamua ai, o lea ua galulue faatasi Matagaluega ia e lua, o lo o i ai le isi faitauga o le isi census lea e tulai mai e tai sefulu tausaga ma fai, lea la ua galulue faatasi Matagaluega ia e lua, e aumai ai se fuainumera foi lea e maopopo uma. O le questionnaire lea ua galulue Matagaluega ia e lua ina ia tasi lava le questionnaire capture uma tagata ia e mananao ai aua o mea nei e fai e le Matagaluega lenei, e ave lava i le Matagaluega o Faatoaga, le mea lea o le Agriculture census e faaoga e le Matagaluega o Faatoaga. O lea la ua feutagai Matagaluega nei e lua, o lea la ua galulue faatasi. Sa galulue faatasi foi i tausaga ua tea, ae o le faalavelave, e i ai census tai sefulu tausaga pei ona saunoa ai sui usufono mamalu. Ae i ai foi la surveys tai lua tausaga ma fai, mea lava tau agriculture. Pei la o i ina lea na feteenai ai nai numera laiti, a o le most complete data lava latou, ia o le fuainumera lenei e tai sefulu tausaga ma fai, lea ua galulue i ai Matagaluega e lua ia aua ne i toe tulai mai se tulaga lea pei o le mea lea na tulai mai i le tatou Fonotaga lea na tea, e pei e lua Matagaluega e faia le galuega e tasi.

O le faamalamalama lenei lau Afioga.

FOFOGA FETALAI: Malo faafetai fesoasoani mai i lau Afioga i le Minisita. Tulai mai Toeolesulusulu.

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, faafetai lava mo le avanoa. O le vaega lava lea e tasi, ae o le toe faaopopo atu lau Afioga, ona e maitau atu o le taimi nei e le gata i le agriculture ae o lo o fai foi survey ma census a isi Matagaluega. O le fautuaga lava ina ia faaoga le Tulafono Tau Faaofi lenei ina ia aumai uma ai i lalo pei foi o le tele o Lipoti e aumai, e ese stats e aumai e le Matagaluega o Tourism, ese stats e aumai e le Pulega o le Malae Vaalele. E avatu ai le fautuaga i le Pulega lea e i ai, ina ia mafai ona tapena uma e latou survey ina ia faaoga e nei Matagaluega eseese ina ia tasi ai le collection o le information. Faafetai.

FOFOGA FETALAI: Ia, tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, o le mafuaaga tonu lava lenei o le aumai o le Tulafono Tau Faaofi lenei, o lea la e galulue faatasi pei ona saunoa le Afioga i le Minisita. A o fautuaga ia pei ona aumai e le tootoo na faamaui atu nei, e leai o mea na ua leva ona tapena mai lea e faagasolo ai nei, lea ua mafua ai ona aumai le tatou Tulafono Tau Faaofi mo le agai atu i luma.

FOFOGA FETALAI: E talitonu e leai se tuaoi o mea lelei, o le maitau lea a le Nofoa. Ma e taua foi finagalo o sui usufono ona o le manumanuga i le tele o resources e toe duplicate ai galuega. A o le faatulai mai o le

Matagaluega o Fuainumera Faamauina, e taua tele, e le gata i le faitauaofai o tagata sa tatou i ai muamua, a o lea ua faitau faatoaga, faitau aseta ma faitau ma le tamaoaiga. O le itu taua lena, ona o le siitia o le auunaga a le Matagaluega, ma ou te manatu ua manino ma malamalama ai le mataupu lea, o le faitauaofai e le gata i tagata, o fale ma faatoaga ma atinae.

Faamaonia le Fuaiupu 26.

FUAIUPU 27: Faamatalaga o le a aoina mai i tusiga igoa o le faitau aofai o tagata ma fale.

Faamaonia.

FUAIUPU 28: Suesuega ma isi tusiga igoa.

Faamaonia.

FUAIUPU 29: Auala e aoina mai ai faamatalaga.

FOFOGA FETALAI: O lo o i ai le Teuteuga a le Komiti 1 e Fuaiupu 29(b) e pei ona faaalai i le Pepa Faaopoopo o Galuega.
Tulai mai lau Afioga i le Taitaifono o le Komiti.

Tofa Hon TUUU ANASHI LEOTA: Lau Afioga i le Fofoga Fetalai ou te faatu le Teuteuga i le Fuaiupu 29(b) e faapea:-

“TEUTEUGA:

Fuaiupu 29(b):

Ina ia faaofi upu “i le tulaga e aupito sili ona lelei na te mafai ai ona” I le tuana'i ai o le parakalafa (b) a o lumanai ai upu “tuuina atu”, ina ia faitauina ai le Fuaiupu 29(b) e faapea:

“29. Auala e aoina mai ai faamatalaga – Ina ia mafai ona aoina mai faamatalaga e ala i se tusiga igoa po o se suesuega, e ao i le Faamau Fuainumera a le Malo ona: (b) i le tulaga e aupito sili ona lelei na te mafai ai ona tuuina atu se pepa o faamatalaga i so o se tagata ua aafia ai, fale e mau ai tagata po o nofoaga o pisinisi, e ala i so o se faiga e manatu le Faamau Fuainumera a le Malo ua tatau ai, i luga o mafuaaga talafeagai (lea e mafai ona aafia ai faasilasilaga o le nofoaga e mafai ona maua mai ai pepa o faamatalaga faaeletoni: ma.””

Faamaonia le Teuteuga.

Faamaonia le Fuaiupu 29 e pei ona Teuteuina.

FUAIUPU 30: Tiute tauave o le faamaeaina o pepa o faamatalaga ma tuuina atu o faamatalaga.

Faamaonia.

FUAIUPU 31: Tiute tauave ina ia maua mai pepa o faamatalaga mo tusiga igoa.

Tofa LEALAILEPULE RIMONI AIAFI: Lau Afioga i le Fofoga Fetalai, e faamalulu atu i lau Afioga o lea sa ou tulai atu i le Fuaiupu 30 a ua vavevave faamolemole lava.

FOFOGA FETALAI: Ia, o le a la le fuaiupu Leala?

Tofa LEALAILEPULE RIMONI AIAFI: O le Fuaiupu 30 lau Afioga.

FOFOGA FETALAI: Malie ua uma ona pasia le Fuaiupu 30. O lo o i ai i lalo o le Fuaiupu 35 ma le Fuaiupu 36.

Tofa LEALAILEPULE RIMONI AIAFI: Ou te le malie lau Afioga ae ua lelei faafetai.

FOFOGA FETALAI: O lo o i ai i lalo o le Fuaiupu 35 ma le Fuaiupu 36, e tutusa lelei lava le faauigaina. Se i oo atu i ai ona toe tulai mai lea o le faauilavea. O lo o i ai le Teuteuga i le Fuaiupu 31.

FOFOGA FETALAI: O lo o i ai le Teuteuga a le Komiti i le Fuaiupu 31 e pei ona faaalua i le Pepa Faaopoopo o Galuega.
Tulai mai lau Afioga i le Taitaifono o le Komiti.

Tofa Hon TUUU ANASII LEOTA: Lau Afioga i le Fofoga Fetalai ou te faatu le Teuteuga i le Fuaiupu 31(1)(a) e faapea:

“TEUTEUGA:

Fuaiupu 31(1)(a).

Ina ia faaofi upu “logoina le Ofisa o Fuainumera po o le” I le tuanai ai o le Puipui (a) a o lumanai ai upu “maua mai” ina ia faitauina ai le Fuaiupu 31(1)(a) e faapea:-

“(a) logoina le Ofisa o Fuainumera Faamauina po o le maua mai ai o lea pepa o faamatalaga mai le Faamau fainumera a le Malo;’ ma

Faamaonia le Teuteuga.

Faamaonia le Fuaiupu 31 e pei ona Teuteuina.

FUAIUPU 32: Tuusaunoaga i tiute tauave lautele mo tusiga igoa.

Tofa AVEAU TUALA LEPALE NIKO PALAMO: Lau Afioga i le Fofoga Fetalai...

FOFOGA FETALAI: O le a le fuaiupu Aveautau?

Tofa AVEAU TUALA LEPALE NIKO PALAMO: O le Fuaiupu 32 faamolemole.

FOFOGA FETALAI: Tulai mai le sui usufono.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o le Fuaiupu 32(2), o lea e tulai mai ai tapuaiga faalelotu lea e faapea mai i i e mafai e le tagata ona le faamalamalamaina po o le a le tapuaiga e i ai. E i ai lou popolega lau Afioga mo le silafia foi o lea o le a sui le faiga o le tatou sitiseni, i le vaega la lea, o tagata nei faatupu faalavelave, terorisi nei ae mumusu e faatumu le vaega lea. Pe le tatau ona tuu i ai se teuteuga i ina e tatau ai lava ona faaali mai e le tagata lea po o le a le ituaiga lotu e lotu ai. Aua mo le silafia o tagata Samoa uma lava, e tatau lava ona i ai le Ekalesia e lotu ai, ae o lea e sau le faaupuga lea po o le a se faaiuga a lau Afioga, pe le mafai ona tuu i ai se vaega lena e puipuia ai lea vaega faamolemole.

FOFOGA FETALAI: Lelei. Ia lau Afioga i le Taitaifono.

Tofa Hon TUUU ANASII LEOTA: Manaia le finagalo o le sui usufono, o tulaga uma lava ia sa sailia e le Komiti, ma o lea e i le vaega lava lea muamua. E agavaa se tagata e talosagaina se fesoasoani mai le Ofisa pe a i ai ni tulaga faapea. Ma lou faaaloalo lava.

Tofa AVEAU TUALA LEPALE NIKO PALAMO: O le vaega lea ou te fia fesili atu ai lau Afioga i le Fofoga Fetalai, o le mea foi lele e pule le tagata pe faailoa mai le lotu e lotu ai pe leai. E i ai le aia a le tagata e faaali mai le lotu... o lea la ou te faaali atu ai se manatu e tatau ona tau mai po o le a le ekalesia po o le a le tapuaiga e i ai, ae le tatau ona alu tuusaunoa ai faapea. E pei o le uiga lena o lau fesili. Ma lou faaaloalo lava.

FOFOGA FETALAI: O lea e i ai i lalo o tatou pepa fuainumera, o le tasi lena fesili o le Pepa, o le ekalesia e aofia ai le tagata o lo o tusia lona suafa. Ua ou manatu ou te faamaonia lea tulaga, o lo o faamauina foi le tulaga lea tau ekalesia. Ou te manatu ua tali ai le atugaluga o le sui usufono.

Faamaonia le Fuaiupu 32.

FUAIUPU 33: O pisinisi mai fafo o lo o faagaioia i totonu o Samoa.

Faamaonia.

FUAIUPU 34: Aia tatau tau asiasiga ma tiute tauave e usitaia ai o Talosaga.

Faamaonia.

FUAIUPU 35: Malosiaga e talosagaina ai le toe tuuina atu o faamatalaga.

Faamaonia.

FUAIUPU 36: E ao ona tuuina atu faasilasilaga i le Faamau Fuainumera a le Malo e uiga i le i ai o se galuega e faatino.

Faamaonia.

FUAIUPU 37: Faamatalaga molimau.

Faamaonia.

FUAIUPU 38: Soligatulafono.

FOFOGA FETALAI: O lo o i ai le Tueteuga a le Komiti i le Fuaiupu 38 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa Hon TUUU ANASHI LEOTA: Lau Afioga i le Fofoga Fetalai ou te faatu le Teuteuga i le Fuaiupu 38 e faapea:-

“TEUTEUGA:

i) Fuaiupu 38(3)

Ina ia aveese le “24(3)” ma suia i le “23 po o 24” ina ia faitauina ai le (3) e faapea:-

“(3) O se tagata o ia lea ua faia tautoga po o se tautinoga i lalo o le fuaiupu 23 po o le 24 ma ua ia maua se avanoa po o ua tuuina i ai le avanoa i faamatalaga ae peitai e le o usitaia so o se manaoga po o se tulaga faasaina i lalo o ia fuaiupu, ua ia faia se soligatulafono ma e noatia i luga o moliaga laiti i se sala tupe e le silia le 20 iunite tau faasalaga.”

ii) Fuaiupu 38(8):

Ina ia faaofi upu “o le tagata lava ia po o” I le tuanai ai o le upu “faamoemoe” a o lumanai ai upu “ina ia maua mai ai se tupe” ina ia faitauina ai le (8) e faapea.

“(8) Afai ua faamalieina le Faamasinoga e faapea na faia se soligatulafono ua faamatalaina i totonu o lenei fuaiupu mo le faamoemoe o le tagata lava ia po o ina ia maua mai ai se tupe, e mafai e le Faamasinoga ona faaee atu se sala tupe faaopoopo e le silia le aofai e faatoluina (3) le tau aoga o tau i tau tupe e mafua mai le tagata solitulafono mai le faataunuina o le soligatulafono.”

Faamaonia le Teuteuga.

Faamaonia le Fuaiupu 38 e pei ona Teuteuina.

FUAIUPU 39: Faatonuga faa-Minisita.

Faamaonia.

FUAIUPU 40: Tulafono Faatonutonu.

Faamaonia.

FUAIUPU 41: Soloia, teuteuga tau soloaiga ma teuteuga faatupulaia.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: O le a le fuaiupu Lealailepule?

Tofa LEALAILEPULE RIMONI AIAFI: O le fuaiupu 41 lau Afioga.

FOFOGA FETALAI: Tulai mai le sui usufono mamalu.

Tofa LEALAILEPULE RIMONI AIAFI: Faafetai. O le mea la lea ua ou toe tulai atu ai lau Afioga, aua sa ou faapea e i ai se Teuteuga a le Komiti i le Vaega lea i le Fuaiupu 4. E tutusa lelei lava le Teuteuga lena e sau i ina ma le Fuaiupu la e ua aveese i luma Fuaiupu 14, lena e i ai i ina le malosiaga, aua o lea sui, o lea o le a sui lou igoa o le Resitala Aoa o Pepa Fanau, Pepa Maliu ma Pepa Faaipoipo, o lena la ua toe i ai ma le isi suiga fou lena ua faatu mai, ae ia te ia le malosiaga e tofi ai sui resitala ma ofisa sinia o le vaega lea o le BDM, vaega o faamaumauga o pepa fanau ma mea faapena. O lea la ua aveese i luma, ae le o aveese i tua. O lea la ou te fia fesili ai lau Afioga i le Taitaifono po o le a le mafuaaga, aua e le mafai la ona aveesea i luma ae tumau i tua. Aua o tagata uma lava o tagata faigaluega a le Ofisa o Faainumera Faamauina. Ma le faaaloalo lava.

FOFOGA FETALAI: Lau Afioga i le Taitaifono.

Tofa Hon TUUU ANASII LEOTA: Faafetai. Masalo o le finagalo o le sui usufono o le Tulafono lea ma ona vaega eseese, e i ai lava vaega e talafeagai ai. E pei lava o lea e i le Vaega 9 lea e faapea mai, vagana ai ua aiaia i se isi faiga e ese ai i totonu o lenei Tulafono, e faaogaina le Tulafono o Galuega a le Malo 2004 i le faamau fuainumera a le Malo, le Ofisa mo ni tagata ofisa, e faapei ai o le Ofisa o se Matagaluega. Lau Afioga pei o le mea lea, o lea lava e manino le tulaga...

FOFOGA FETALAI: Se i tulai mai le sui usufono.

Tofa LEALAILEPULE RIMONI AIAFI: Lau Afioga o le mea lea na ou fautua atu ai i le amataga, aua o lea o le a inconsistent i i le Tulafono o lea o le a ave le malosiaga i i, a o lea ua aveese i luma, aua o le Tulafono Tau Faaofi lava e tasi. Afai o lea ua aveese i luma le malosiaga lea e tofi ai e le Statistician tagata faigaluega mai le ACEO level agai i lalo, e tatau foi la ona aveese i tua i i. A o lea la ua foliga mai ua aveese i luma, a o lea e tumau i i. O le mea la lena lau Afioga, e tatau ona fai se faaiuga mautu po o fea le mea e i ai, pe i ai pe leai. Afai e lea i i luma, e le tatau foi la ona i tua aua o le a tele ai la ma le faaetonu o le Tulafono Tau Faaofi. Ma le faaaloalo lava.

FOFOGA FETALAI: Ia, ne i mau eseese le finagalo o le sui usufono mamalu ma le mea ua maea ona soalaupule i ai le Komiti. E faamalulu atu foi i le atugaluga o le sui usufono mamalu. O lea ua manatu ua faatolu, faafa ona tulai mai le Komiti i le afioga i le Taitaifono, tatou te amanaia le lauiliuina sa

i ai latou, aemaise foi teuteuga sa aofia ai ma le afioga i le Loia Sili. Ona ou talitonu lea, tatou onosaia ma ave lea i uta. A i ai foi ni faaletonu e tulai mai, a o lea ua faamauina lou atugaluga ina ia toe silasila i ai le Komiti i se taimi o le lumanai, ae manatu ua manino ma malamalama le faatulai mai o le mataupu.

Tofa LEALAILEPULE RIMONI AIAFI: Lau Afioga, ou te ava tele i lau Afioga ma lau faaiuga, e le toe suia foi. Na pau lava lea lau Afioga, o le tatou Palemene ma ona tulaga i le faafoega o tatou Tulafono Tau Faaofi. Ne i tei ua faapea mai e alotamala le Palemene i le faiga o Tulafono nei ma le faiga o faaiuga. Aua o le mea sao, e tatau ona toe sui le Tulafono Tau Faaofi, ona tatou pasia lea nei ae toe sui taeao. O le mea moni lava lena lau Afioga.

FOFOGA FETALAI: O lea ua maua lou finagalo Leala, e le manatu faatauvaa foi i le finagalo lea ua e taua. O le taua, o lea ua faafofoga le Minisita, faafofoga le Taitaifono, ia ave lea i uta. E le uma le tulaga o le faamanatu ma le matimati, a o lea ua taua lou lalaga, leaga e taua ia te au le finagalo o le Afioga i le Taitaifono. E toafitu latou, o le Faauluuluga o le Matagaluega, toavalu, toasefulu i le Loia Sili, oka oka oka. E toasefulu i latou na faia le faaiuga. A o lea e taua lou finagalo. E manatu o lea ua manino ma malamalama.

Toeolesulusulu...

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, e lagolago atu foi i le mataupu e pei ona faaalua. Na pau si tuualalo, pe le mafai ona fausia i totonu o le tatou Palemene. O le taua o le Palemene e toe silasila i ai i vaega ia ona e taua tele le vaega lea e fa. O lou lea talitonuga lau Afioga, pe le mafai ona faatu atu se lafo e aveese le Fuaiupu 4 lea ina ia fetai ai ma le vaega pei ona iloiloia. Ona o lea e pei ona taua, o lea e tau mai i i, e mafai e le Statistician ona filifilia tagata e avea ma ACEO. A o le vaega tonu lea o lea e sau i luma, o lea ua aveese le power lea. O lou la talitonuga, mo le faasaoina foi o se isi Teuteuga, e faatu atu ai le lafo, *Ina ia aveese le Fuaiupu 4 lea, ona consistent lea.*

FOFOGA FETALAI: Se i tulai mai le Afioga i le Sui Palemia.

Tofa Hon FONOTOE NUFESILI PIERRE LAUOFO: Lau Afioga i le Fofoga Fetalai ou te tulai atu e tusa ai ma le mataupu. O lea e sao lelei lava le saunoaga a le Taitaifono o le Komiti. A lea e aumai lalo o le Fuaiupu 9 o le Tulafono Tau Faaofi, lea ua uma ona pasia le Fuaiupu 9. A o mea faapea, e nafa ma le PSC pe a oo i tulaga ia, e faigofie ia o le mataupu ona faasolo lava lea i le process masani ma tulaga e pei ona i ai i le faatinoga o galuega a le Malo i lalo o le Matagaluega o lo o Pulea Tagata Faigaluega. Vaai i mea faigofie, e sao lelei le Taitaifono. O lou talitonuga, e le manaomia se teuteuga i lea mea ma le lafo lea e faatu mai.

FOFOGA FETALAI: Ia, e manatu ua manino ma malamalama le Tulafono Tau Faaofi.

Tofa LEFAU HARRY SCHUSTER (Vaimauga Sisifo): Lau Afioga i le Fofoga Fetalai, ou te lagolagoina le manatu o Lealailepule i le inconsistency. I lau vaai i ai i le Tulafono Tau Faaofi, tusa o le vaega lea e finauina ai nei, o lea ua ave le power foi lea i le Registrar e mafai ona ia tofia ai tagata ua uma ona tofia i le Matagaluega, e sui resitala ma isi tofiga faapea o faamaumauga. E pei la o lea ua ave le isi power lea i le Resitala, a o le hire ina o tagata ia mai le amataga, e hire mai le PSC. E pei la ua tele atu le power lea e i lalo i le Resitala nai lo le power o le PSC lea na amata ona... O le faataitaiga e mafai ona hire le tagata e amata mai, just for an example as an office clerk, ae uma ane faigaluega pe 15 tausaga ae fai mai le Sui Resitala, o lea o le a ou hire ina oe e te Sui Resitala, ae ese le mea na amata mai ai na tofi mai e le PSC.

E pei la o lau faataitaiga lena i le tulaga lea e inconsistent. O lea e i totonu o le Tulafono Tau Faaofi, o lea e manino le Tulafono, ae pei la o le mea lea e talanoa mai ai Lealailepule, e hire mai e le PSC i le amataga i totonu lava o le Matagaluega, ae oo ifo la i le taimi e promote ai, ua fai e le Sui Resitala le promotion. O se manatu lena e tuu atu i lau Afioga.

FOFOGA FETALAI: Se i tulai mai le Sui Fofoga Fetalai.

Tofa AGAFILI PATISELA ETEUATI TOLOVAA (Palauli Sisifo): Lau Afioga i le Fofoga Fetalai, na o se mea lava e fia faamalamalama. Talu mai lava ona faavae mai le Malo o Samoa i le vaega lea o pepe fananau mai, tagata maliliu ma le faamauiina o faaipoipoga, sa i lalo lava o le Matagaluega o Faamasinoga mai lava i le amataga. I le 2002 ina ua fetuunai galuega fai a le Malo, faatoa see ese ai loa tuu i lalo o le Matagaluega o Tupe. I le taimi lea a o i lalo o le Matagaluega o Tupe e pei sa i ai i lalo i ina se tulaga le mautinoa i le taimi lea, aua o le galuega atoa o le faamauiina o pepe fananau mai, tagata maliliu ma le faamauiina o faaipoipoga, e le fesootai ma le Matagaluega o Tupe.

I le 2008, sa toe filifili ai loa i le faaiuga a le Malo ina ia toe faasee ese le Ofisa o Pepa Fanau, Faaipoipoga ma e Maliliu i lalo o le vaega lea e i ai nei o Fuainumera Faamauiina. Ma sa i ai lava se feteenaiga i lea taimi, ona e atagia mai o lea ua tuu uma i i mea tau fuainumera. A o fuainumera i lalo o le Ofisa Pepa Fanau, Tagata Maliliu ma Faaipoipoga, pei o historical figures, ae pei e le talafeagai. Talu foi la ona faavae mai, o le resitala autu po o le general registrar, o le faauluuluga o le Matagaluega. I lalo foi o le Ofisa o Faamasinoga, o le Failautusi o Faamasinoga i lena vaitaimi, o ia lava lena o le faauluuluga, ae ave la le delegation i le Sui Resitala na te faatinoina ai le galuega. E pei e foliga mai le taimi lena e oo mai i le taimi lenei o lea e tau faaata mai e le Tulafono, e pei o se vaega tumaoti le faamauiina o pepe fananau mai, tagata maliliu ma faaipoipoga. Ma o lau tilotilo atu i ai i le Tulafono Tau Faaofi, o lea lava e sao le Tulafono i le taimi lenei, o le resitala autu o pepe fananau mai, tagata maliliu ma faaipoipoga lea na te tofia Sui Resitala ma ofisa i lalo ifo. Ma le faaloalo lava.

FOFOGA FETALAI: Ia, ou te manatu ua manino ma malamalama le taumafai mai o le Sui Fofoga Fetalai, e manatu foi o lea ua manino le faamalamalamaga a le Sui Palemia ma le....

Ia, Lealailepule....

Tofa LEALAILEPULE RIMONI AIAFI: Faafetai i lau Afioga, o la e lava e saunoa le Sui Fofoga Fetalai ia i le history, ae faafetai lava o lea ua malamalama i le history o le mea aua e le o le tatou mataupu lena o lea e talanoa. Ae o lea ou te tulai atu e faalua le lafo a le Afioga i le sui usufono mamalu mo Aana Alofi Nu.3, ina ia toe aveese aua o lea ua aveese i luma. Ma le faaaloalo lava.

FOFOGA FETALAI: Ia, tulai mai le Taitaifono o le Komiti.

Tofa Hon TUUU ANASHI LEOTA: Lau Afioga i le Fofoga Fetalai, e le seetia foi i le malu o le tai taeao le Komiti lena i finagalo foi ua faaalua o sui usufono. O le Tulafono lava ia i lona taatiaga atoa o lo o matua atoatoa i lona sao. O le Fuaiupu 41 o le Tulafono Tau Faaofi lena, e tutusa lava ma le Fuaiupu 4 o le Tulafono foi lea o Pepa Fanau ma Faaipoipoga. E leai lava la se mea o feteenai ai, ma e leai se inconsistency i le mea lea e i ai. Ma o lea la ou te... e moni lava o le tofiga e fai mai e le PSC, ae leaga sa i ai mea na tutupu i le faasologa mai o galuega ia a Matagaluega ma Faalapotopotoga a le Malo, lea na i ai le finagalo o le Malo ina ia faataoto lelei mai, toe foi mai tofiga i le Kapeneta ona faasolosolo ai lea ina ia tonu ma sao. Ae leai lava ma se mea o faaletonu lau Afioga, matou te le talia foi lafo faatutu mai. Ma lou faaaloalo.

FOFOGA FETALAI: Ia, e manatu ua manino ma malamalama le mataupu, e le taea finagalo o sui usufono mamalu. Se i tulai mai Afualo.

Afioga AFUALO WOOD UTI SALELE: Faafetai lava i lau Afioga. O le faigofie ia o le mataupu. E sao lelei lava le tulaga lea se i vaeane lava lau Afioga. O le faa-Peretania lea e i lalo le Fuaiupu 4, aua o lea ua aveese i luma, "The Registrar in general may appoint." O lona uiga, e moni lava o la e le o maoti mai a o la e i ai a o lea ua aveese ma luma, e le tatau la ona i ai. E faigofie ia o le tatou mataupu, ae pei o lea o le a faauliulito le tofa a le Taitaifono se i tulou lava, ae tatou o i le mea e tatau ona fai. O lea ua aveese ma luma, ae tatau ona aveese ma i, ona faigofie lava lea ae le o feteenai. Faafetai.

FOFOGA FETALAI: O lea ua ou maua. Se i tulai mai le Afioga i le Minisita mo Fuainumera Faamauiina.

Afioga Hon LAUTAFI FIO SELAFI PURCELL: Lau Afioga i le Fofoga Fetalai, leai o lea ou te tilotilo atu i le faaupuga o le Tulafono Tau Faaofi lea, o le mea lea e sau i i, o le mea foi lea o le designation po o le delegation, e mafai e le Registrar General ona appoint se isi i totonu o le Ofisa e sau e fai galuega, act as o le designated mo se taimi. E i ai foi Tulafono sa tatou talanoa ai foi, na tulai mai ai mea ia, e le suia ai le Tulafono faapea e aafia ai Tulafono a le PSC, lea e appoint e le PSC le ACEO. Ae mafai i totonu o le Ofisa, afai e le o i ai le ACEO o la e ua i ai se mea o loo le auai i totonu o le Ofisa e faatino ona tiute masani. E mafai la e le Sui Resitala ona appoint mai se isi e sau e fai galuega a le ACEO, o le mea e tau o le delegated authority po o le designated foi lea powers e ave i ai. O le uiga tonu lava lea o le Section 41 lea, ae le faapea e alu e appoint mai ni tagata fou, e le o ni tagata

fou ia e appoint mai, o tagata lava la e i totonu o le Ofisa e mafai ona tuu i ai le delegated power e sau e fai galuega faa-ACEO po o isi foi senior officers pe afai o malaga le ACEO po o malaga le senior officers. O le uiga tonu lava lea o le 41 lea lau Afioga. Ma le faaaloalo.

Tofa AGAFILI PATISELA ETEUATI TOLOVAA: Lau Afioga i le Fofoga Fetalai o le mea e fia faamalamalama. O le tulaga lea e taatia mai ai le Tulafono Tau Faaofi, e lua titles ae tasi le tagata. O luma o le Government Statistician, a o tua o le General Registrar. E faatino galuega ia e lua e le tagata e toatasi. E eseese la galuega a o lea e sao lelei le faataatiaina o le Tulafono Tau Faaofi, o luma i le Government Statistician lea e aofia uma ai lava le vaega lea i le Matagaluega o Fuainumera Faamauina, a o tua i i e pei ona ou faamalamalamaina atu e pei e tau tulaga ese lea la ua kava mai e le Tulafono Tau Faaofi o le General Registrar.

Ma le faaaloalo lava.

Tofa LEALAILEPULE RIMONI AIAFI: Lau Afioga toe pau lea o lou manatu ma le faaaloalo lava, o le mea ua finagalo le Malo e fai, fai, ona pau lava le mea e i ai foi le taimi tatou te faapea ane ai. E! Ua sasi foi le vaai o lena e sao outou, fai atu ai foi aua o le ato fevailiai e faapena. Aua o le upu lea e sau i le vaega 14 ma le vaega lea e talanoaina nei e 41 o le appoint. Ma le faaaloalo lava ua malie foi faafetai.

FOFOGA FETALAI: O le appoint lava o le dedicate. Ia outou malilie ia e le uma ai ae tuu le Tulafono Tau Faaofi se i alu, a i ai ni sasi, ou te ofo lava i se Ofisa Sili o Pulega e nofo ma toe fai se mea e le talafeagai ui o lea faafetai i la outou tuualalo. Ia taatia mai, tatou o i le aiga o sa taatia mai e lelei lena e manino ai ma malamalama.

FUAIUPU 41: Soloia, teuteuga tau soloaiga ma teuteuga faatupulaia.

Faamaonia.

FAAMATALAGA.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Fuainumera Faamauina 2014.

FOFOGA FETALAI: Tulai mai le Taitaifono o le Komiti o lo o i ai le Faasaoga

Tofa Hon TUUU ANASHI LEOTA: Faafetai i lau Afioga, leai na o sina faaopoopo i saunoaga a sui usufono. E leai se Malo valea e fai ni mea e leaga

ai le atunuu, e tilotilo foi le Komiti mo le sologa lelei o le atunuu. Ma lou faaaloalo.

Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuaiunumera “2014” ma suia i le fuainumera “2015” ma faitauina ai le Igoa o le Tulafono Tau Faaofi e faapea:

Tulafono o Fuainumera Faamauina 2015.”

Ma lou faaaloalo lava.

FOFOGA FETALAI: Malo prince.

Faamaonia le Faasaoga.

Faamaonia le Fuaiupu 1 ma le Igoa e pei ona faasaoina.

TULAFONO TAU FAAOFI O TEUTEUGA O LE TULAFONO O LE PULEGA O TUPE A LE MALO 2014 -iloiloga auiliili

FOFOGA FETALAI: E tusa ai ma le Tulafono Tumau 106, e tataua ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai le Afioga i le Taitaifono o le Komiti o Tupe Maua ma Tupe Totogi.

Susuga Hon PAPALIITELE NIKO LEE HANG (Taitaifono Komiti o Tupe Maua ma Tupe Totogi): Faafetai i lau Afioga i le Fofoga Fetalai mo le avanoa. Ua ou tulai atu ma le agaga faaaloalo e faatu le lafo, *Ina ia faamaonia e leni Fono Aoa le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o le Pulega o Tupe a le Malo 2014 faatasi ma Faasaoga.*

Faaluaina e se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow ma le sui usufono mo Aleipata Itupa i Lalo.

FOFOGA FETALAI: Ou te faasilasila atu ua faamaonia nei e le Fono Aoa le Lipoti a le Komiti o Tupe Maua ma Tupe Totogi i le Tulafono Tau Faaofi o Teuteuga o le Tulafono o le Pulega o Tupe a le Malo 2014.

O le a sagai atu loa le Fono Aoa i le Iloiloga Auiliili o le Tulafono Tau Faaofi o Teuteuga o le Tulafono o le Pulega o Tupe a le Malo 2014.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

FUAIUPU 2: Teuteuga lautele.

Susuga PAPALII LIO FAAVAIVAIOMANU TAEU MASIPAU: Lau Afioga i le Fofoga Fetalai, ou te fia faafesili atu lava i le Taitaifono po o le Afioga i le Minisita e ona le Tulafono Tau Faaofi. Po o le a le eseese o le faamatalaga o fuafuaga faataaitia o le tamaoaiga ma le fuafuaga faataaitia mo le atinae o Samoa? E fia faamalamalama i ai lou sui usufono aua o lea ua sui mai agai i le isi mea. Po o i ai se eseese?

Ma le faaloalo.

FOFOGA FETALAI: Tulai mai le Taitaifono.

Susuga Hon PAPALIITELE NIKO LEE HANG: Faafetai atu i le sui usufono mo le faafesili. E faigofie lava le tali. E leai se eseese. Ma le faaloalo lava.

FOFOGA FETALAI: Malie le sui usufono se i tuu atu le avanoa i le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, o le tulaga o le tusi foi lea e faamatala mai ai le strategy, e leai lava se eseese ma le tulaga lea e tasi. Ona pau lava le mea lea ua sui ua sui le tauga, sui le igoa. O le igoa lea sa sau ai i aso ia o le statement of economic strategy, o lea ua sui nei i le strategy for development of Samoa. A o le tulaga lava i fuafuaga faataaitia alualu mamao a le Malo lea i totonu o le tusi lena, pau lava le mea lea e sui mai o le igoa.

Tofa LEALAILEPULE RIMONI AIAFI: Malie lau Afioga ou te fia fesoasoani atu i le fesili leaga o au o le sui o le Komiti. Sa ou fesili foi i le fesili lea i le Matagaluega ina ua o atu. E sao lelei, e i ai le eseese lau Afioga, faamalulu atu lava – o le tamaoaiga is more specific i mea tau le tamaoaiga a o le atinae e ta aofai i mea e fai e le atunuu ma le Malo. O le vaai a le Matagaluega lea ua aveese ai le upu lea “tamaoaiga” sa masani ai ae tuu ai le “atinae”, o so o se atinae lava ma so o se mea a le Malo ma le atunuu e aofia ai. Ma le faaloalo lava, o le tali lena.

Susuga PAPALII LIO FAAVAIVAIOMANU TAEU MASIPAU: Lau Afioga i le Fofoga Fetalai, leaga o au lea na laga o le mafuaaga lena na ala ai ona ou fesili a o le mea sili o lea ua manino e eseese, o le ala foi lea o le sui mai o le isi mea i le isi mea. Ou te talitonu a oo loa i fuafuaga faataaitia mo le lumanai e pei o lea e i ai polokalame a le Malo mo le isi 5 tausaga, o lona uiga ua mautinoa e eseese.

FOFOGA FETALAI: O le mea e fia faasao, o le atinae lava o le tamaoaiga. O lea e maua i le saunoaga a le sui usufono mamalu – se i tulai mai le Taitaifono o le Komiti.

Susuga Hon PAPALIITELE NIKO LEE HANG: Faafetai lava i lau Afioga mo le avanoa, i lou talitonuga o mea nei o atinae o le bottom line lava o le tamaoaiga, o atinae ia e develop mo le aotelega o le tamaoaiga. E pei o se faamatalaga lena ou te fai atu ai o le mea lava e tasi, na ona fesui ai lava o igoa a o le agai lava ia faaleleia le tamaoaiga, a o le atinae le mea e mafua mai ai ona faalelei le tamaoaiga. Ma lou faaloalo lava.

Tofa LEALAILEPULE RIMONI AIAFI: Lau Afioga leai e le o se faaaliga o se fia poto, leaga o au na fesili ai i le fesili lea ma le faamalamalama a le Matagaluega, i le faatoa sifiina mai o le economic development agai i le development e eseese model e faaoga. Afai e faaoga le vai foi lea a le nuu e feinu ai ma le vai taele e le o se atinae lea e maua ai se tupe a se isi, o le social well being aua – e pei o le mea lena leaga o au o le sui usufono o le Komiti sa ou fesili ai i le mea lea. Ma lou faaloalo lava.

FOFOGA FETALAI: O lea ua maua ua e toe agai mai e faasaga tau i le Lipoti a la outou Komiti a o mea na e tataua ona faale i totonu ma faamalamalama. O lo o manino le faamalamalama a le Sui Palemia ma le Taitaifono.

FUAIUPU 3: Ua teuteuina le fuaiupu 5.

Faamaonia.

FUAIUPU 4: Ua teuteuina le fuaiupu 17.

Faamaonia.

FUAIUPU 5: Ua teuteuina le fuaiupu 19.

Faamaonia.

FUAIUPU 6: Ua teuteuina le fuaiupu 20.

Faamaonia.

FUAIUPU 7: Ua faaofiina le fuaiupu 78A fou.

FOFOGA FETALAI: Tulai mai le sui usufono mo Faasaleleaga Nu. 2.

Susuga PAPALII LIO FAAVAIIVAIOMANU TAEU MASIPAU: Lau Afioga i le Fofoga Fetalai o le Fuaiupu 7, lea ua maitau atu o le tasi lea

mataupu sa ou laga i le faitauga faalua. Leai, o le upu lea i le faatupeina o se tupe gau i le Tala Faatatau o Tupe. Sa saunoa le Minisita o Tupe le Afioga i le Palemia faapea o tupe pau aua o lea e sau lava i le Tulafono Tau Faaofi lea e sau e faapea o le tupe gau. Po o le mea o le sao a la o le tupe gau? Ma le faaaloalo lava lau Afioga.

Susuga Hon PAPALIITELE NIKO LEE HANG: Lau Afioga i le Fofoga Fetalai, e lua lava faaupuga o le tupe lea pe a sau le tupe maua ua laitiiti i lo le tupe faaalua. E lua lava tauga, pau pe gau. A faapea o se Faalapotopotoga foi lea e le o sue tupe e fai ni polofiti ia e pau, a o se tupe e tatau ona sue le polofiti o le gau, o le tatou Malo lea e sue ni polofiti. Ma le faaaloalo lava.

Faamaonia le Fuaiupu 7.

FUAIUPU 8: Ua faaofiina le Vaega XIA fou.

Faamaonia.

FUAIUPU 9: Ua teuteuina le fuaiupu 107.

Faamaonia.

FUAIUPU 10: Ua suia le fuaiupu 108.

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, o le Fuaiupu 10 faamolemole.

FOFOGA FETALAI: Tulai mai le sui usufono mamalu.

Afioga TOEOLESULUSULU CEDRIC POSE SALESA SCHUSTER: Faafetai, a o le faafesili atu i le Taitaifono ma le Komiti i le vaega lea o quarterly summaries, lea e faaali mai e ave mo le faasalalauina i le Savali. Pe le i silasila le Komiti pe le i ono tuu i ai i le Tulafono Tau Faaofi lea le aumaia i totonu o le Palemene le Lipoti lenei ona o lea ua tapena summaries. O lou talitonuga atonu o se vaega taua lea i totonu o le Tulafono Tau Faaofi le faaoo mai totonu o le Palemene o ia quarterly ina ia mafai ona Iloilo e le Palemene ae le o le faatalanoa i tua atu o le Palemene.

Susuga Hon PAPALIITELE NIKO LEE HANG: Lau Afioga ua talia le fautuaga.

Faamaonia le Fuaiupu 10.

FUAIUPU 11: Ua teuteuina le fuaiupu 110.

Faamaonia.

FUAIUPU 12: Ua suia le Faamatalaga 5.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o le Pulega o Tupe a le Malo 2014.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa e pei ona faaalua i le Pepa Faaopoopo o Galuega.

Tulai mai le Afioga i le Taitaifono o le Komiti o Tupe Maua ma Tupe Totogi.

Susuga Hon PAPALIITELE NIKO LEE HANG: Lau Afioga i le Fofoga Fetalai, ou te tulai atu ma le agaga faaaloalo ou te faatu le lafo, *Ina ia faagasolo le Tulafono Tau Faaofi o Teuteuga o le Tulafono o le Pulega o Tupe a le Malo 2014 faatasi ma Faasaoga.*

Ma le faaaloalo lava.

FOFOGA FETALAI: Malie lava lau Afioga i le Taitaifono, i le aveesea o le fuainumera 2014 ma suia i le fuainumera 2015 ona faatoa oo atu ai lea i le fesili mulimuli lena.

Susuga Hon PAPALIITELE NIKO LEE HANG: E faamalulu atu i lau Afioga ona ua sese le mea lea ua faitau atu. Lau Afioga i le Fofoga Fetalai, ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuainumera “2014” ma suia i le fuainumera “2015” ma faitauina ai le Igoa o le Tulafono Tau Faaofi e faapea:-

Teuteuga o le Tulafono o le Pulega o Tupe a le Malo 2015.”

Faamaonia le Faasaoga.

Faamaonia le Fuaiupu 1 ma le Igoa faatasi ma le Faasaoga.

TULAFONO TAU FAAOFI O FAIAOGA 2015
- faitauga muamua

FOFOGA FETALAI: Tulai mai le Minisita o Aoga, Taaloga ma Aganuu.

Afioga Hon MAGELE MAULIU (Minisita mo Aoga, Taaloga ma Aganuu): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faiaoga 2015 i lona faitauga muamua.*

Faaluaina e le Minisita mo Galuega Tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi i lona faitauga faalua i le aso Fono lona tolu e mulimuli mai.

TULAFONO TAU FAAOFI O FEAGAIGA I SINEVA 2015
- faitauga muamua

FOFOGA FETALAI: Tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Feagaiga i Sineva 2015 i lona faitauga muamua.*

Faaluaina e le Sui Fofoga Fetalai, sui usufono mo Aleipata Itupa i Lalo ma le Minisita mo Galuega Tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso Fono lona 3 e mulimuli mai.

TULAFONO TAU FAAOFI O VAI PULEA TUMAOTI 2015
- faitauga muamua

FOFOGA FETALAI: I le toesea ai o le Afioga i le Minisita mo Tina ma Tamaitai, Atinae o Nuu ma Afioga ma Agafesootai, tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Vai Pulea Tumaoti 2015 i lona faitauga muamua.*

Faaluaina e le Sui Fofoga Fetalai ma le Minisita mo Galuega Tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso Fono lona 3 e mulimuli mai.

TULAFONO TAU FAAOFI O TEUTEUGA O LE TULAFONO O TAAVALE FEOAI I ALA TETELE 2015 - faitauga muamua

FOFOGA FETALAI: Tulai mai lau Afioga i le Minisita mo Galuega, Felauaiga ma Atinae Eseese.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Taavale Feoai i Ala Tetele 2015 i lona faitauga muamua.*

Faaluaina e le sui usufono mo Falelatai ma Samatau ma le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso Fono lona 3 e mulimuli mai.

TULAFONO TAU FAAOFI O LE FAAUIGAINA O TULAFONO 2015 - faitauga muamua

FOFOGA FETALAI: Tulai mai lau Afioga i le Sui Palemia.

Tofa Hon FONOTOE NUA FESILI PIERRE LAUOFO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faauigaina o Tulafono 2015 i lona faitauga muamua.*

Faaluaina e le sui usufono mo Aleipata Itupa i Lalo ma le Minisita mo Galuega Tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso Fono lona 3 e mulimuli mai.

ILOILOGA O LIPOTI A KOMITI FILIFILIA

P.P. 2014/2015 NU. 206, LIPOTI A LE KOMITI O MATAUPU TAU FAAMASINOVA, LEOLEO & FALEPUIPUI MA FAAMASINOVA O FANUA & SUAFA I LE P.P. 2014/2015 NU. 38, LIPOTI A LE KOMISI O LE TOEFUATAIGA O TULAFONO A SAMOA I LE TULAFONO FAATONUTONU A LE AU FAASALALAU, LIPOTI 10/12 - ILOILOGA

FOFOGA FETALAI: Tulai mai le Taitaifono o le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa. Lau Afioga i le Taitaifono, Afioga Afoafouvale John Moors.

Afioga AFOAFOUVALE JOHN MOORS (Sui Taitaifono Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa): Lau Afioga i le Fofoga Fetalai ou te tulai ma lou faaaloalo lava e faatu le lafo, *Ina ia faautagaia e lenei Fono Aoa le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

Faaluaina e le sui usufono mo Falelatai ma Samatau, sui usufono mo Gagaiufomauga Nu. 2 ma se tasi o sui usufono mo Vaimauga Sisifo, Tofa Lenatai Victor Faafoi Tamapua.

FOFOGA FETALAI: Tulai mai lau Afioga i le Sui Taitaifono mo le faitauga o tatou Fautuaga ma Iugafono.

Afioga AFOAFOUVALE JOHN MOORS: E faamalulu atu i lau Afioga o lo o atu alii Ofisa o lo o faapea ona taulimaina.

Lau Afioga i le Fofoga Fetalai, ou te tulai atu e faitauina Fautuaga, Iugafono ma Sailiiliga a le Komiti mamalu.

FAUTUAGA:

I le faia i luga o ana sailiiliga ma ana sutesuega auiliili, e fautuaina ai e le Komiti le Malo:-

Ina ia faautagia le Lipoti a le Komisi o le Toefuataiga o Tulafono a Samoa, o lo o auiliili atu ai ana Fautuaga mo le toefuataiga o le Tulafono Faatonutonu a le Afaasalalau.

Ina ua maea lelei sailiiliga ma iloiloga a le Komiti, e fautuaina ai i le Fautuaga 1 e oo i le Fautuaga 21, ua tuuina mai e le Komisi o le Toefuataiga o Tulafono a Samoa e tauala i lenei Lipoti, ua manatu le Komiti ua atoatoa ma talafeagai aua lava le faaleleia atili o matafaioi ma tiute tauave mo le fausiaina o le Tulafono Faatonutonu a le

Aufaasalalau. O fautuaga a le Komisi mo le toefuataiga o le Tulafono Faatonutonu a le Aufaasalalau, e tasi lava lona faamoemoe autu, o se taunuuga lelei o le auaunaga a le Aufaasalalau, ina ia mafai ai ona tali atu i manaoga o le Malo ma tagata lautele.

IUGAFONO:

I le maea ai o Iloiloga a le Komiti, na faaiugafonoina ai e fautuaina le Fono Aoao:

Ina ia faamaonia le P.P. 2014/2015 Nu. 38, Lipoti a le Komisi o le Toefuataiga o Tulafono a Samoa i le Tulafono Faatonutonu a le Aufaasalalau, Lipoti 10/12.

Ma lou faaaloalo lava.

FOFOGA FETALAI: Malo i lau Afioga i le Sui Taitaifono, e manatu ua manino ma malamalama lau outou Lipoti ua tuuina mai.

Tulai mai le sui usufono mo Faleata Sisifo.

Tofa LEALAI PULE RIMONI AIAFI: Lau Afioga i le Fofoga Fetalai, faafetai foi i le Sui Taitaifono mo le taumafaiga o le latou Lipoti. E pei ona tagai i ai lau Afioga ma le maitau a lenei foi Itu, e ese le format lea e aumai ai le Lipoti lea, e leai se fautuaga. E tasi lava le fautuaga lea e faapea mai ina ia talia le Lipoti, ae le o auiliiliina mai ni fautuaga. O le mea lea e fesili ai lau Afioga, o le mea lea e alu agai i ai le Tulafono lenei o le Regulation o le Tulafono Faatonutonu o le News Media Council, o le fono a le Aufaasalalau. Ae manatua foi lau Afioga, o lea e le i taunuu mai le Tulafono e faavae ai le Media Council, lea e kava uma ai le tele o mea nei. A o lea e foliga mai ua muamua mai le Regulation tailo te i ua sese Au, a o lau faitau i ai i mea ia e aumai, o mea uma nei o lea ua agai i ai le Media Council. O lea Tulafono lea ua maea ona aumai i totonu o le Maota lea i totonu i i le address e tagai i ai ma aumai ai le futuaga.

O lea ou te fia fesili ai i lau Afioga i le Taitaifono po o fea tonu le News Media Council lea e agai i ai Teuteuga nei ma le Lipoti lenei a le Komiti? E i ai le fautuaga taua lena e aumai i le Lipoti lenei, e le o se Fautuga a la outou Komiti a o le fautuaga a le Law Commission. O lo o faapea mai ia toe tagai ane i le Tulafono foi lea e taua o le Prison and Publisher Act, Newspaper and Printers Act lea e i ai le Vaega 7 o le Tulafono foi lea ina ia aumai i lumamea pe faalauiloa igoa o tagata e lavea i le defamation lea i totonu o le Pepa. O lea e fautua mai le Law Commission e tataua ona toe tagai ai le Komiti ma le Palemene e aveese Teuteuga, pe Amend pe repeal, aveese le vaega lea o le Tulafono ona e ono tutai ai ma le lelei atoatoa ai le faatinoina o galuega a le aufai nusipepa a o lea e sau lo outou finagalo e le o atagia ai po o le a tonu le finagalo o le Komiti i le fautuaga taua lea e aumai e le Law Commission, ma le anoanoai o fautuaga ia e tulai mai.

O le fesili muamua lau Afioga po o fea tonu le News Media lea ua aumai le Regulation lea e teuteu aua o lea ua taatia mai i le taimi lenei le Media Council pe mafai la ona tali mai lau Afioga.

FOFOGA FETALAI: O lea ua maua lou finagalo.

Afioga Afoafouvale John Moors: Faafetai lava mo le avanoa, ae faigofie lava la matou Lipoti e ui ina tele lo matou taimi e tausailiili ma talanoaina ai le fautuaga na aumai i le Komisi. I le maea ai o a matou iloiloga ma sailiiliga ma matou maitauina ai o le tonu ma le sao lelei o fautuaga ia e aumai i totonu o le Lipoti a le Komisi. Ua matou manatu foi ua talafeagai lava fautuaga ua faapena ona tuuina mai i le Komisi e tele le latou galuega sa matou iloiloina ma matou autasi ai ma le matou Komiti, o la sa atoatoa tapenaga a le Komiti po o a latou fautuaga foi ua faapena ona matou lagolagoina. E manino lava i totonu o le matou fautuaga matou te lagolagoina atoatoa fautuaga a le Komisi e tusa ai o ana faataatiaga, fautuaga ma ana faamatalaga ua tuuina mai i totonu o le latou Lipoti.

Ma lou faaaloalo lava.

FOFOGA FETALAI: O le a avatu muamua le avanoa i le sui usufono mo Aana Alofi Nu. 3, ona avatu ai lea i le sui usufono mo Gagaemauga Nu. 2.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. Lau Afioga i le Fofoga Fetalai, e fia maua sina malamalamaaga mai le Komiti ona o lea ua feoloolo lava Lipoti ua faataatia mai le Maota e le Komiti lenei aemaise lava le Lipoti a le Commission o Tulafono. Ona o le tele o nisi o Lipoti o lo o maoti Iloiloga ma Fautuaga e faatuina mai, peitai o le Lipoti a lenei Komiti e pei na o le latou ioeina o fautuaga e aumai e le Land Commission ae le o i ai se suesuega o nisi o Matagaluega po o Pulega e aafia ai i lea vaega. O se faataitaiga lau Afioga o le Lipoti lea e tele ina talanoa i le Media Council ma Newsprint ae pau lava tagata ia na suesueina ma faatalanoaina e le Komiti na o le Ofisa o le Law Commission, pe aisea ua le aumai ai Matagaluega po o Pulega tonu ia e i ai, ona o lea e i ai fesuaiga o le Tulafono aemaise po o ua silasila le Komiti i le Tulafono e pei ona taua e nisi o sui usufono, o lea ua i ai le Media Council Bill. O lou talitonuga e ao foi i le Komiti ona silasila i ai i lea Tulafono ona aumai ai lea o le fautuaga po o a ni aafiaga o le Tulafono o lo o faataatia mai ma vaega o recommendations o lo o aumai e le Law Commission. O le fesaosoani atu lea lau Afioga i le Fofoga Fetalai.

FOFOGA FETALAI: Mo le faasaoina o le taimi o le Taitaifono tulai mai le sui usufono mo Gagaemauga Nu. 2.

Tofa LEVAOPOLO TALATONU: E puupuu lava lau Afioga i le Fofoga Fetalai se manatu, ona o lea ua tilotilo atu ua aumai le Lipoti i luga o regulations. O le mea lea e fia faafesili atu ai i le Komiti, o lea e pending le aumaiga e le i pasiaina le Media Council Bill. E tataua ona base agai i ai regulations ia ua aumai muamua. E pei o le mea lena ou te le iloa la pe faapefea ona fai lea ituaiga Lipoti lea ae leai se Principal Act e base i ai le latou Lipoti. Faafetai.

FOFOGA FETALAI: Malie le sui usufono sei avatu le avanoa i se tasi o sui usufono mo Vaimauga Sisifo, Lefau Harry Schuster.

Tofa LEFAU HARRY SCHUSTER: Lau Afioga i le Fofoga Fetalai, na ona fesoasoani atu i le matou Taitaifono, lea e pei ua faaseseina i tatou ona o le faaupuga lea e faaogaina i totonu o “Regulations”. O le faaupuga o le regulating iga o le Media Industry, a o le Tulafono lea na matou tilotilo i ai o le Media Council Bill lea e aumai ai le Lipoti lea, ae pei ua muamua mai le faaupuga “Regulation” i luma e foliga mai e le o se Tulafono, o le Tulafono o le Media Council Bill a o le faaupuga “regulation” lena e sau ai i totonu e pei o le faaupuga foi lea e to facilitate le regulating le Media Industry, but thats not the same – we would not consider any regulations.

FOFOGA FETALAI: Malo, o lea ua manino ma malamalama.

Afioga Toeolesulusulu Cedric Pose Salesa Schuster: Lau Afioga i le Fofoga Fetalai, faamolemole lava o le mea lava lea e tasi. O lea e maitau atu afai o le Media Council Bill lea e i ai, o lou lea talitonuga e tataua la ona fai faatasi finagalo o le Law Commission i totonu o le Tulafono ina ia aumai pe i ai ni suiga e talafeauga ma o latou recommendations nei, i totonu o le Media Council Bill pe i ai ni amendments ona faaoo mai ai lea, ae faigata i lou mafaufau ona faavasega le ese o le aumai o le Lipoti i le Law Commission ae leiloa po o ua ave ai i totonu o le suiga pe talafeauga pe manaomia foi le Media Council Bill, faamolemole mo se faamalamalamaga.

FOFOGA FETALAI: Malie se i avatu le avanoa i le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, ua ou alofa lava i le Taitaifono, e foliga mai e matua le malamalama i mea ia e fai atu. Ona ou fautuaina lea o lau Afioga i le Fofoga Fetalai, toe faaui i tua le Lipoti se i pasia le Tulafono o le Media Council. Ua ou alofa lava i le Sui Taitaifono lau Afioga.

Afioga AFOAFOUVALE JOHN MOORS: Faafetai mo le avanoa, leai e le tetena foi se finagalo po o se loto i faamatalaga ua lafo mai. O le Lipoti lenei e mafai ona tatou faatusa i se faatusa faigofie foi lea ua muamua i luma le taavale ae mulimuli mai le manu se i tulou. O le Lipoti lenei e aumai o recommendations o Regulations a o le Tulafono la ua amata, o le mea lena e talanoa atu ai ua matou lagolagoina le Lipoti ona o la ua faatino ona o le Lipoti o le mea atoa lea ua aumai e le Komisi lenei ua talafeagai lelei lava ma le matou suesuega ma matou sailiiliga. E pei foi la ona tuu avanoa ma faasalalau mo e omai e talanoaina lenei Lipoti, e le mafai e matou ona o atu e tauanau tagata pe a le omai, ae na o le Lipoti lava ia matou te talanoa i ai mo sailiiliga a le Law Commission po o le Komisi ia faapea ona fausia ai le tulaga ua taatia i totonu o le TulafonoTau Faaofi.

Ma lou faaaloalo lava.

Tofa Hon FONOTOE NUFESILI PIERRE LAUOFO: Lau Afioga i le Fofoga Fetalai, o lea ou te faitau atu i le Lipoti a le Komiti, o le Lipoti a le Komiti i le Lipoti ma Fautuaga a le Komisi a le Samoa Law Reform Commission, tusa o le Lipoti lea na aumai e le Samoa Law Reform Commission i le Maota lenei. O le Lipoti la lena a le Matagaluega lea e toe iloilo ina Tulafono a le atunuu ma le Malo, lea na faasee i le Komiti lea ma ua

toe lipoti mai le Komiti lenei i le Lipoti a le Samoa Law Reform Commission, ae le o se Tulafono lea e aumai ai le Lipoti lea. E lua lava mea ia na aumai i le Lipoti a le Law Reform Commission lea e silasila i ai, o le toe sailia lea po o a ni aiaiga e faatonutonu ai le Media i Samoa, lea na aumai ai le latou lipoti ma le latou fautuaga. O lea e fai mai ai e 21 fautuaga.

Ia ma le lua, ua aumai ai foi ma a latou fautuaga i le ituaiga Tulafono Faatonutonu e manaomia mo le aiaia o tulaga tau le Media, ae le o aafia fua le Tulafono o le Media Council Bill o lea o lo o talia pea le Lipoti a le Komiti sa faasee atu i ai le Tulafono lena. O le tulaga lena lau Afioga i le Fofoga Fetalai, o lau lena faitau atu i le Lipoti.

FOFOGA FETALAI: Malo faafetai. Tulai mai le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai, leitioa sese le faagasologa o le Lipoti, o lea ua saunoa le Sui Palemia ua atili nunumi ai ma le malamalama le Lipoti. O lea ua maua i i e pei ona saunoa le Taitaifono ua muamua mai le taavale solofanua ae mulimuli mai le solofanua. O lea ua avatu le tuualalo se i aumai le tatou Tulafono leaga o mea uma ia o le Tulafono e aafia i i.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, a lea ua avatu le faasaoga i le tulaga lea. O lea ua manino lava lea tulaga e pei ona fai atu o le Lipoti i luga o le isi Lipoti. O lea na aumai ai le latou fautuaga ua latou iloiloaina le Lipoti a le Samoa Law Reform Commission ua talia atoatoa fautuaga e 21, faagasolo loa le tatou galuega.

Tofa LEALAILIPULE RIMONI AIAFI: Lau Afioga i le Fofoga Fetalai, leai o lea ua maua le atoatoa o le mataupu lea. O lau faitau i le Lipoti, o le fautuaga mai le Law Commission o lea e matua lelei ma atoatoa. O le Lipoti lea lau Afioga sa tatau ona faasee mai i le Komiti lea e talanoaina le Tulafono a le Media Council. O lea ua manino e le ese le Media Council ese le News Media Council, o lea ua i ai le feteenaiga lea, e le mafai foi ona tatou faapea ua tatou taliaina uma mea ia e aumai i le Lipoti lea, leaga o lea e i le Komiti le aano atoa o le Lipoti lea e le i aumaia i le Lipoti, e feteenai la. O le Lipoti lea a le Law Reform Commission e base i luga o le Media Council ua uma ona faataatia i le Maota ma faasee i le Komiti e tatau ona avatu i le tatou Komiti e tilotilo i ai aua e tele fautuaga aoga e fesoasoani ai. Ou te talitonu ua aoga foi...o le mea lea e fautua atu ai i lau Afioga....

FOFOGA FETALAI: O lea ua matua manino lelei ma malamalama le atugaluga o sui usufono, o lea foi ua ou maua le finagalo o le taumafai mai o le Lipoti a le Komiti. O le Lipoti a le Komiti na ala ona mafua ona faasee i ai ona o le Tulafono Toefuataiga a le Ofisa o le Loia Sili lea na mafua ai ona aumai le latou Lipoti. E leai se mea o le a aafia ai fua le tatou Komiti i le Tulafono lea o le a tatou agai e fai i le Media Council, o le taua foi o le pasi aloaia e le Komiti o le Lipoti e aoga ia tatou ma a tatou sailiiliga nei e fai. E aumai sailiiliga na faia e le Komiti e ala i fautuaga a le Komisi o Tulafono Toefuataiga a le Ofisa o le Loia Sili, ona aumai lea e matimati ai le Tulafono Autu, a o le Lipoti e le o se Tulafono. O lea ua ou maua lelei na ala ona lipoti

mai ona o le Lipoti a le Komisi o le Toefuataiga na tuuina mai i le Maota, ou te manatu ua malamalama lelei le mataupu.

Tofa LEALAILEPULE RIMONI AIAFI: Faafetai, e le faafinauina lou finagalo, pau lava lea lau Afioga, sa tatau ona i ai se avanoa e talanoa faatasi le Lipoti lenei ma le Law Commission ma le tatou Tulafono Tau Faaofi o lo o faagasolo le talanoaina aua e matimati ai le Tulafono ina ia atoatoa. O lea ua aumai nei le Lipoti aua e leai se galuega tele a le Komiti na fai i ai, ae faafetai o lea ua umai ma tatou tagai i ai e aoga mo tatou i le taimi e oo mai ai le Tulafono a le Media Council i se taimi o i luma.

Ma le faaaloalo lava.

FOFOGA FETALAI: E pei ona ou fai atu i le taimi ua sola, e leai lava se tuaoi o mea lelei. E aoga foi le Lipoti a le Komiti ua latou faamaonia ma latou suesueina e taua mea ua nanau mai ai le Komisi Suesue o le Tulafono Toefuataiga.

Susuga PAPALII LIO FAAVAIVAIOMANU TAEU MASIPAU: E leai ae atonu o lea foi ua manino lea mataupu ae sa talanoaina foi e le matou Komiti e sao lava, o le tulaga lava lea e taua foi lenei mataupu mo le faatinoina o a tatou galuega. O le mea moni lava ina ua talanoaina e le matou Komiti, sa matou o lava i le Tulafono, peitai sa faailoa mai e le Failautusi o le matou Komiti lea, faataunuu pea lo outou tiute i le talanoaina o le Lipoti a le Komisi ona ave lea i le Palemene pe pasia pe a ma le fautuaga na aumai ai. O le agaga lena a ua aoga foi le lagalaga mo le agai i luma o la tatou galuega, ma le faaaloalo.

FOFOGA FETALAI: Malo le onosai i le tatou Komiti, e talitonu lava e lagalaga finagalo o sui usufono leaga o lo o i ai isi Tulafono taua o lo o mulimuli mai, ae faafetai e le i faapea na vale tuulima la outou galuega ae taua lo outou faamanatu. Ona o au nei o le Taitaifono o le Komisi o lo o iloiloaina le isi Tulafono o lo o agai mai, e taua la outou Lipoti o le a matimati ai ma fai ma faamanatuga ma molimau aemaise o fautuaga o lo o tuuina mai e le Komiti o lo o iloiloaina le Tulafono o e o lo o Faasalalau.

Na famaonia le Lipoti.

P.P. 2014/2015 NU. 203, TALI ATU A LE MALO I LE P.P. 2014/2015 NU. 135, LIPOTI A LE KOMITI O GALUEGA, FELAUAIIGA MA LE SIOSIOMAGA I LE P.P. 2014/2015 NU. 65, LIPOTI FAALETAUSAGA A LE PULEGA O UAFU MA TAULAGA A SAMOA MO LE TAUSAGA FAALETUPE FAAIUIINA ASO 30 IUNI 2012

FOFOGA FETALAI: Tulai mai le Minisita mo Galuega, Felauaiga ma Atinae Eseese.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P. 2014/2015 Nu. 203 o lo o tuuina atu ai*

Tali a le Malo i le P.P. 2014/2015 Nu. 135, Lipoti a le Komiti o Galuega, Felauaiga ma le Siosiomaga i le P.P. 2014/2015 Nu. 65, Lipoti Faaletausaga a le Pulega o Uafu ma Taulaga mo le Tausaga Faaletupe faaiiuna aso 30 Iuni 2012, e tusa ai ma le Tulafono Tumau 54.

Faaluaina e le Minisita mo Aoga, Taaloga ma Aganuu.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai, o le Tali atu lenei a le Pulega o Uafu ma Taulaga e tusa ai ma Fautuaga sa tuuina mai.

TALI ATU A LE MALO I LE P.P. 2014/2015 NU. 135, LIPOTI A LE KOMITI O GALUEGA, FELAUAIGA MA LE SIOSIOMAGA I LE P.P. 2014/2015 NU. 65, LIPOTI FAALETAUSAGA A LE PULEGA O UAFU MA TAULAGA A SAMOA MO LE TAUSAGA FAALETUPE FAAIUINA ASO 30 IUNI 2012

“FAUTUAGA:

- 1 Taofia le toe faaaogaina o ni Tagata po o ni Kamupani Tu-i-le-Va e faaaoga e le Pulega mo le faatauina mai o ana aseta taugata, ona ua matauina e le Komiti le le ausia o le tulaga aupito sili ona moomia (quality) o ia aseta.

Tali:

- 2.1 Ua taliaina ma le agaga faafetai e le Pulega o uafu ma Taulaga le fautuaga e pei ona tuuina mai, ma o le a silasila totoa foi le Pulega i le taofia lea ona toe faaaogaina o ni Tagata po o ni kamupani Tu-i-le-Va mo le faatauina mai o ni ana aseta taugata.

FAUTUAGA:

- 2 Silasila i se Faaiuga Talafeagai mo le aitalafu a le Pulega i le va ma le Matagaluega o Tupe Maua talu mai le lima tausaga talu ai seia oo ma ii le vaitaimi o lo o iloiloina, ona o lea aitalafu e afua ma ii tiute o masini na auina mai mo galuega a le Malo.

Tali:

- 2.2 E tusa ai ma aitalafu a le Pulega i le Matagaluega o Tupe Maua mai le 5 tausaga talu ai ona o tiute o masini na auina mai mo galuega a le Malo; ua maea ona tuuina atu lenei mataupu i le Vaega o Tiute a le Matagaluega o Tupe Maua mo se faaiuga talafeagai, ma o lo o talia nei le iloiloina o lenei mataupu e tusa ai ma faamauga na tuuina atu.

FAUTUAGA:

- 3 Tatau ona faalelei ma siitia le tulaga o le uafu i Matautu mo faamoemoega o tupe maua faafaigaluega, ae toe fetuunai fuafuaga mo le fausia o se isi uafu fou ona ua faamaonia ma ii faamauga a le Pulega o lo o faaitiitia le aofai o vaa o lo o afea Samoa.

Tali:

2.3 O lo o talia nei le faaleleia o le Uafu i Matautu i lalo o fesoasoani a le Malo o Iapani, e le gata mo le siitia ma le faaleleia atili lea o auunaga ae faapea fuafuaga faataatitia a le Pulega mo le siitia o ana tupe maua mai le faaaogaina o lenei Uafu. O lo o faagasolo foi fuafuaga mo le fausiaina lea o le Uafu i Vaiusu, ina ia mafai ona faaofi mai vaala'u-oloa ma meli laupasese tetele i totonu o le atunuu ma atili ausia ai ni tulaga silisili ona lelei.

FAUTUAGA:

4 E tatau i le Pulega ona tausisia ma faatau aiaiga o Tulafono Tau Le Gataifale Faava-o-Malo (IMO) mo le faatinoina o latou galuega ina ia mautinoa le faamalieina ma le usitaia o aiaiga o ia Tulafono Faava-o-Malo.

Tali:

2.4 O lo o faatau pea e le Pulega aiaiga o Tulafono Tau Le Gataifale Faava-o-Malo (IMO) mo le faatinoina lea o ana galuega tau i le gataifale, ina ia faamalieina atoa ai ma usitaia aiaiga o ia Tulafono Faava-o-Malo.

E avea foi lenei avanoa e momoli atu ai se faafetai a le Pulega o Uafu ma Taulaga i le Komiti e tusa ai ma fautuaga tuuina mai, e le gata mo le alualu i luma ma le siitia lea o auunaga ae faapea le faaititia atili lea o tupe faaalu. Tuuina atu ma le faaaloalo tele.

Na faamaonia le Lipoti.

FOFOGA FETALAI: Ia, e manatu o lea ua maea ai i i galuega fuafuaina o le aso. Ua maea lelei le tatou Pepa o Galuega sa fuafuaina, ua talafeauga lelei ma le tatou taimi malolo. I le agaga faaaloalo, e momoli atu ai le faafetai tele i le paia ma le mamalu o le tatou Maota Fono i le tatou Fonotaga i lenei taeao na liugalua. Faafetai le tauatai, faamalo atu le usufono, faamalo malele, faamalo saunoa, faamalo fetalai. Ou te manatu ua tele ma anoanoai a tatou galuega i lenei aso, e le gata i tatou Tulafono Tau Faaofi faatoa faitauina, Tulafono Tau Faaofi faitau faalua, ae ua tatou oo foi i Tulafono ua iloilo auiliili. Ona i ai lea o le talitonuga, e momoli atu le agaga faafetai tele i le tauavameaina o le tatou galuega i lenei aso. Faafetai le onosai i le paia ma le mamalu o le tatou Maota, malo le tauatai mai lava le taeao analeila e oo mai lava i lenei vaega o le aso. E manatu o lea ua atoatagi le tatou galuega pei ona faatulagaina.

E i ai le talosaga a le Fofoga Fetalai, malilie le paia ma le mamalu o Taitaifono ma Komiti o lo o i ai pea a tatou galuega o lo o tuua, e manatu ma talosaga atu pea ma le agaga maualalo, o lo o avanoa pea le tatou Ofisa o le Fono i taimi talafeagai a o tatou i ai i lenei vaiaso, e talosaga atu ina ia aua ne i toalia le tatou galuega, e tatau lava ona papaaveloa a tatou galuega, o lo o i ai a tatou galuega tuua. E fai foi ma tau fetuunai galuega a le Ofisa o le Fono pe afai e tuai laitiiti mai galuega a le Komiti. A o le agaga lena ma le faamoemoe, o lea ua tatou maitau i le aso lenei, e lima a tatou Tulafono Tau

Faaofi faitau muamua. O lona uiga o le aso lona tolu, Aso Tofi e tatau ona faitau faalua uma ai Tulafono Tau Faaofi nei ma faagasolo ona tuu atu foi lea i le tulaga masani. O lona uiga, e fai si tele o le galuega lea foi o le a toe faaopoopo atu, e tatau la ona faateleteleai mai a tatou galuega ua tuuina atu i o outou aao. E le tau aoaia e Laupua Tamafaiga le paia e o tatou Komiti faa-Palemene. E tatalo atu pea le Fofoga Fetalai ia tautuana le tatou galuega ia autafeloa. O le manatu ua tatou tulalata foi i le afa o le tausaga, tatou te talanoa i le tatou Tala o le Tupe ma le Budget, a ia kilia ese le tele o galuega o lo o mafai ona toalia ai le tatou Fono. O le manatu e tatau ona oo atu i le tatou Fono o le Aso Faraile ua tatau ona tele se tatou galuega ua tatou ausia. Ona ou manatu lea, ua tatau ona fai se tatou malologa. O le talitonuga o le a vavae foe o le tatou Fono, o le a tatou malolo i le aso a taeao ae tatou toe ae mai i le Aso Tofi ona o le fetuunaiga o tatou galuega o lea ua aumai le tuualalo a le Failautusi o le Fono ma i latou uma e fetuunai ai tulaga o galuega ina ia faataunuuna le faitauina o Tulafono Tau Faaofi e lima lea sa faitauina nei i lona faitauga muamua i le aso, e tele ai galuega ma anoa a tatou Fonotaga. A tatou Fono i le aso a taeao, e le taitai lava a tatou galuega e faatino ai le Fono. Ua outou silafia, e le tatau ona vale tuulima lo outou afifio mai ma tala mai aao ae puupuu a tatou Fono. Faafetai i lenei aso o lea ua tau le tatou Fono i le itula e 1, ae maitau i galuega mo le aso a taeao, e puupuu. E sili ai pe a tatou tolopo mo le aso a taeao ae tuu uma le faiva o Pili i le Aso Tofi, e oo atu i ai ua faitau faalua uma Tulafono Tau Faaofi e lima lea na faitau muamua nei, ma le tele o nisi o lipoti e tatau ona faatuina mai i totonu o le tatou Maota Fono i le Aso Tofi ma le Aso Faraile.

O le tatalo lea ma le agaga faaaloalo e faamanatu atu ai i a outou Afioga i Taitaifono ma Sui Taitaifono ma Komiti, ina ia outou alofagia le tatou galuega. E tatalo atu foi i le tatou Komiti o Tulafono Tumau, Faiga Palota, e moomia se tatou fonotaga i le aoauli nei ma le Afioga i le Minisita o le Ofisa o le Komesina o Faiga Palota, ina ia faamautuina le Tulafono aua le tuuina mai i se aso o le vaiaso lenei. O lo o faagasolo tulaga o le faiga palota ma taualumaga ua tatou tulalata i ai.

Ona faatai lea ma se leo, le paia e ma le mamalu o le tatou Maota i lenei aso, e momoli atu le agaga faafetai ma le faamalo. Faafetai foi i Ofisa Sili o Pulega ma Pule Sili o Matagaluega ma Faalapotopotoga a le tatou Malo ua tatou faatasi, ia maua pea lo outou malosia aua le feagai ai ma galuega fai. Samoa ma lau tapuaiga i lenei aso, ia tui mai pea le mulipapaga a o alofaiva lou Palemene. O a foi tiuga o le vaatele i taualumaga o lenei aso ua sii mai ai le fala siigata i nisi o itumalo tetele o le atunuu ona o le fuafuaga o le tauavameaina o aai o finagalo, e tatalo pea ina ia toa le tai, ia malu le vai ma ia maua pea le tootai o finagalo o nuu ma afioaga, o lo o taumafai pea le tatou Malo e fofo alamea mataupu ina ia taoto i lagatonu, o a mea e tulai mai i le tulafono, ia e manatu e itiiti, ae itiiti a alegamea.

E talitonu foi o le tatou maea e tasi e mama ai se avega ma ia maua le femalamalamaiga i le va faafeagai ai e le gata i le Malo, a o le pule mamalu a alii ma faipule ma Samoa atoa. Ou te manatu ai o le a fai se tatou faiga malologa i lenei aso, ou te tatalo atu i le sui usufono mo Anoamaa Sasae lau Tofa Alo Fulifuli Taveuveu ina ia tulai mai e fai se tatou tatalo, ona tatou malolo ai lea.

Na tolopo Taulumaga a le Fono Aoao i le itula e 1:05 i le aoauli seia aulia le itula e 9:00 i le taeao o le Aso Tofi, 19 Mati 2015.